

遼東文獻徵略

全四本

遼東文獻徵略卷七

遼陽金毓猷撰

典籍第五

松漠紀聞

松漠紀聞一卷續一卷宋洪皓撰皓字光弼鄱陽人政和五年  
進士建炎三年以徽猷閣待制假禮部尙書爲大金通問使既  
至金金人迫使仕劉豫皓不從流遞冷山復徙燕京凡留金十  
五年方得歸以忤秦檜貶官安置英州而卒久之始復徽猷閣  
學士諡忠宣事蹟具宋史本傳此書乃其所紀金國雜事始於  
留金時隨筆纂錄及歸懼爲金人搜獲悉付諸火旣被譴謫乃



復追述一二名曰松漠紀聞尋有私史之禁亦秘不傳紹興末  
其長子适始校刊爲正續二卷乾道中仲子遵又增補所遺十  
一事明代吳瑄嘗刻入古今逸史中與此本字句間有異同而  
大略相合皓所居冷山去金上京會甯府纔百里又嘗爲陳王  
延教其子故於金事言之頗詳雖其被囚日久僅據傳述者筆  
之於書不若目擊之親切中間所言金太祖太宗諸子封號及  
遼林牙達什北走之事皆與史不合又不曉音譯往往譌異失  
真然如敘太祖起兵本末則遼史天祚紀頗用其說其熙州龍  
見一條金史五行志亦全采之蓋以其身在金庭故所紀雖真

臆相參究非鑿空妄說者比也

四庫全書總  
目五十一

洪氏云女真酋長乃新羅人號完顏氏完顏猶漢言王也女真

以其練事以首領讓之完顏年六十餘女真妻之以女亦六十

餘生二子其長即胡來也金史世紀云金之始祖諱函普初從

高麗來年已六十餘矣居完顏部部有賢女年六十而未嫁始

祖以青牛為聘禮而納之後生二男長烏魯即胡來洪氏云金祖九代祖名龜福

八代祖名訛魯按龜福即函普訛魯即胡來金祖指熙宗也北盟會編引神麓記云女真始

祖措浦即函普出自新羅奔至阿觸胡無所歸遂依完顏因而氏

焉六十未娶酋長結徒姑丹疑即闡克坦氏亦曰徒單氏金代諸后多為徒單氏女蓋以始祖之

后故為貴宗有室女年四十餘尙未婚遂以牛馬財用農作之具嫁

之於措浦後女真衆酋結盟推為首領牛訛辣魯即烏魯呂思勉

云朝鮮史家謂彼國平州僧名金俊者逃入生女真娶妻生子

為金之始祖又一說為平州僧金幸金幸子克守克守娶女真

之女為妻生子名古乙太師洪氏云自胡來傳三人至楊哥為太師太師為遼所加之封號

金之始祖金人以金為國號蓋取其姓按出虎水正因金氏遷

居於此所以得名至金史稱金人為完顏氏乃從女真之俗用

女系以名之耳見所著中史毓黻按綜觀以上所論可斷定金始祖

實來自新羅非女真之本族女真所妻之女當從神麓記定為

年四十餘以六十餘生子語涉誕妄也始祖既來自異族則其

以本姓為國號亦復近理呂氏又謂金祖為漢族血胤以居朝

鮮之金氏本系實出自中國也此語誠塙亦可為國史中一新

發明矣

韓國小史令人請和於高麗曰昔我太師盈歌嘗言我祖宗出自大國此盈歌即洪氏所謂太師楊哥也為兩

普之七世孫

洪氏又云辛酉歲

金熙宗皇統元年

盡驅以行其人大怨富室安居踰

二百年往往為園池植牡丹多至三二百本有數十幹叢生者

皆燕地所無毓猷案此云安居踰二百年者即於遼太祖天顯

二年始遷迄辛酉歲政為二百四十年以此推之渤海都於忽

汗之日國人必好植牡丹忽汗河一名牡丹江

今牡丹江流域有牡丹嶺者

義蓋本此

洪氏又云自上京至燕二千七百五十里上京即西樓也毓猷

按此上京即金國都會甯府去西樓絕遠西樓為遼上京臨潢

府之別名在今熱河巴林旗至燕之里到亦無二千五百七十里蓋洪氏誤以遼上京爲金上京也再以洪氏所紀之里到攷之自上京三十里至會甯頭舖四十五里至第二舖三十五里至阿薩舖四十里至來流河卽自上京至來流河爲一百六十里來流河今稱蘭陵河距阿城縣正爲百餘里若爲遼上京則距來流河不啻千里矣故知其所指之上京爲金國都無疑洪氏又云古肅慎城四面約五里餘遺堞尙在在渤海國都三十里亦以石累城脚毓黻按賈耽道里記自安東都護府東北千五百里至渤海王城城臨忽汗海其西南三十里有古肅慎城據此則洪氏此條之渤海國都乃指在忽汗之舊都與前所

云者異撰矣否則去遼陽三十里無所謂肅慎古城也

按攷證  
洪氏之

作凡得十餘事於此四事之外  
曾已分入各類故不重舉

### 拙軒集

拙軒集六卷金王寂撰寂字元老薊州玉田人登天德二年進士累官中都轉運使諡文肅命史不爲立傳元遺山中州集載其詩入乙集而仕履亦敘其梗概中州集稱寂著有拙軒集北遷錄諸書今北遷錄已無傳本而元氏所選寂詩僅七首及附見姚孝錫傳一首其他亦久佚不見乾隆四十一年四庫館總纂紀昀陸錫熊纂修汪如藻等自永樂大典中輯出寂詩文若干首釐爲六卷仍署曰拙軒集既佚而復得雖非完璧亦十存



七八良可葆貴矣寂於世宗大定十五年奉使白雲治獄路經

錦州遊覺華島宿龍宮寺有留題詩二首

覺華島未着錄於方輿紀要惟金史李晏

傳有錦州龍宮寺之語故知其錦州又遼東志覺華島在甯遠城東南二十里海中蓋金時甯遠亦屬錦州地故金史云然

二十九年被命提點遼東路刑獄章宗明昌初召還寂序其弟

曲全子詩云大定己酉

即二十九年

余被命提點遼東等路刑獄事

閱再歲會以公集飯素於大清安禪寺偶於稠人中得故人李

仲佐握臂道舊又贈仲佐詩序云李仲佐遼東之豪士也初識

於大元帥席上怪其議論英發坐客盡傾至於通練世務商較

人物雖宿學老儒或有所不及仲佐爲何許人金史及中州集

皆不載既爲寂所盛稱必爲傑士設無此集其姓氏亦湮沒不

傳矣又云天德辛未家君守白霽是歲登上第交遊飲博皆一時豪俊於今二十六年適以審刑復來留數日當時所與遊者往往鬼錄據此則寂父曾官白霽寂亦兩至其地寂撰先君行狀云會遼東更置郡縣守令皆取當時治有聲迹者先君擢海州析木令既至則不以窮鄉僻陋鄙夷其民而百事裁以繩墨數月告治舊俗多蓄蠱毒殺人以祈富先君爲出祕方轉相傳付所活不可勝計海州爲今奉天海城縣地在遼河東與方輿紀要謂白霽在冷陁山附近南去燕山千里之語不合近頃得遼宜州奉國寺碑謂其地左巫閭右白霽遼宜州卽今義縣盛京舊志謂遼中京大定府城卽白霽故地遼之中京爲今熱河

朝陽以西地正在義縣之右寂狀又稱其父後歷中京轉運判官卽所謂天德辛未家君守白霽也自燕赴白霽因欲探覺華島故迂道至錦州非爲中途所必經也寂又有柳城西聞蟬詩亦赴白霽時作

別詳白霽條

其自東營來廣寧道出牽馬嶺弔梁侯

利器二詩則又爲赴官遼陽時所作盛京通志歷朝藝文錄寂詩僅七首皆在遼東之作與中州集所載者頗有出入蓋其時拙軒集已經館臣輯出故輯者得以採入之王氏父子兩世皆官遼東爲名宦一門卓異之選而盛京通志僅錄其詩而不爲立傳亦百密之一疏也

### 遼東志

遼東志解題

日本稻葉嵩吉撰

遼東志者明代之遼東地志也書凡九卷附圖一卷初次編纂

於正統八年

西曆一千四百四十三年

據是年遼東都指揮僉事畢恭所撰

序文謂本書之資料蓋先采訪於永樂中既將正本進呈恭復

欲取其稿本而刊行之其事未果遲至弘治元年

西曆一千四百八十八年

始爲刊行其時爲刊行大明一統志後六年也此次刊本或於

畢恭原稿略有修改然大體仍據舊稿並命名曰遼東志主其

事者爲巡按御史陳寬及遼陽副總兵韓斌嘉靖八年

西曆一千五百

二十九年

復事修改至十六年告成此爲第二次刊本卽本書也嘉

靖四十四年

西曆一千五百六十五年

刊行之全遼志凡六卷大抵以本書

按卽第二  
次刊本

爲藍本而增以嘉靖十六年以後之事蹟命名雖異

實卽遼東志第三次刊本也

細檢本書之所取材蓋於各代史志罕見徵引夫周禮史記可  
置弗論而考證遼東故實之書之成於金元時代者如遼東行  
部志元一統志鴨綠江行部志諸書固不可以一二數而本書  
所甄錄者與此諸書皆渺不相涉卷一山川篇雖錄有與元一  
統志相同之文亦殆自大明一統志彙錄而來校以本書卷首  
所列引用書目僅有大明一統志而無元一統志可知其不誣  
也明代遼東都司案牘圖籍原所具備事無鉅細胥經記載是  
故編纂本書純采明代之資料而已足固不必取材於前代也

而其紀載之詳亦由於此不足怪已惟本書紀載域外之事亦如彼其詳者何哉畢恭之言曰遼東乃東北之雄藩實國家之重鎮爰自永樂中上遣使諭本司纂修圖志乃即欽承上命謹集進呈惟稿是存斯集乃國朝之盛典藩維之偉績可祕乎哉觀於此語豈非當其事者乘朝廷興王之運以采訪所得輯爲此本之明證歟以愚考覽所得本書進呈初稿蓋爲編纂大明一統志而設惜乎一統志所采過簡竟遺却本書之大半而不載也

自正統紀元

西歷一千四百三十六年

以降迄編次本書之前明代用兵遼

東失事最多兀良哈者遼東北部之蒙古族也一稱三衛其漸

次飲馬於潢水之南當亦在正統之初維時泰甯之酋又聯姻於也先可汗遂致遼東西部直當勁敵女直及野人又擾於東邊而本書適成於此邊釁騷然之日此讀者所應留意者也愚以爲畢恭之作斯編非徒謳歌國家一統之盛而已蓋欲使遼東守土之吏諗知遼地之實情以期於吏治邊防有所取資也畢恭爲前屯衛人全遼志載其略傳曰

畢恭字以謙前屯衛籍其先山東濟甯人巡撫王公翺薦公有文武才由百戶舉陞流官僉事圖上方略開設迤西邊堡牆壕增置烽墩兵威大振虜人畏服晉署都指揮奉勅守備甯前地方在任五年邊鄙甯謐尋推掌都司事撫士卒革奸

弊廣田屯興學校平訟理至今稱之所著有遼城吟稿以疾  
卒上遣守諭祭翰林學士盧陵陳循爲撰神道碑

觀此可知恭蓋終其身以經營遼左自任全遼志邊防篇云國  
初畢恭守遼東始踐山河因編木爲垣久之乃易版築而墩臺  
城堡稍稍添置云此卽恭傳所稱開設迤西邊堡牆壕烽堠之

事

畢恭立邊牆事柳  
邊紀略亦言之

邊堡牆壕亦長城之一種其設置興廢關繫

遼東之存亡恭之始終經營以鎮方面功亦偉矣明史稿及明  
史皆缺恭傳故備舉之

東國輿地勝覽所引之遼東志是否爲本書之初次刊本尙爲

一種疑問按勝覽之書編次於朝鮮成宗王之十三年

成化十  
八年



當時曾否付梓殊不能詳其後復有修改嘗刊行於王之二十

三年

弘治二年

而本書第二次刊本後於勝覽刊行之歲約四十

有八年是勝覽所引之遼東志其非本書可以推而知之勝覽

卷五十鏡城都護府建置沿革下本號丐籠耳之語復注云遼

東志作木郎古而本書則無郎木古之文卷五十一平壤都護

府下有性柔而巽借與無寬貸服食儉素有古之遺風一節謂

引自遼東志而本書亦無此文復按初次刊行本書時與初刊

勝覽其間僅隔一歲爾時朝鮮與遼東之交通縱極繁盛然謂

彼邦編輯勝覽已錄及本書之初刊本似尙失之過早惟其間

有可異者卽龍飛御文歌乃於正統十二年二月編撰而其注

中已引有遼東志之一節豈爾時朝鮮之采訪故實者業已甄及遼東乎究之本書之初次刊本卽謂世無傳本無不可也

本書之第二次刊本流傳亦甚希本邦舊紅葉山文庫所存之全遼志與本書僅稱伯仲此外尙未聞有傳本在昔中華本土浙江省寧波府范氏天一閣藏有遼東志及全遼志一書清全祖望鮎埼亭外集有一文引及本書疑卽據天一閣之藏本獨怪乾隆中編纂四庫全書蒐采甚備乃竟未及此二書或以所記間涉建州舊事懼觸忌諱故未敢采進也耶天一閣書目所載如下

遼東志九卷

全

明正統八年任□□監修

全遼志六卷

全

明嘉靖十六年任洛等重修

此記稍誤嘉靖十六年重修之本仍襲舊名題曰遼東志至四  
十三年又經重修始改稱全遼志天一閣藏本卷數與本書及  
全遼志卷數皆符以此攷之可知范氏記載之誤而所以致此  
者蓋以兩書卷端所載之舊序誤作刊行新書之年代也

讀中國邊郡地志可以考見當日國勢之伸縮如漢書地理志  
載有朝鮮四郡其樂浪南部之山川迄今猶仍舊名此卽武帝  
用兵之賜而當日漢室之國勢可以遙制朝鮮從可知矣明代  
之滿洲可分爲二其一部實隸入明之版圖爲其領地其一部  
則爲明之屬衛所謂羈縻州者是也清代官撰諸書嘗謂明初

疆域東盡於開原鐵嶺遼瀋海蓋其東北境全屬我朝及國初  
烏拉哈達葉赫輝發諸國並長白山之納殷東海之窩集等部  
明人曾未涉其境永樂二年倣唐羈縻州之制設尼嚕罕衛七  
年改爲尼嚕罕都司後又續設衛所之空名其疆域遠近原弗  
及知山川城站亦多在傳聞疑似之間

案此文見滿洲源流考卷十二此種

解釋人皆以爲不謬抑知尼嚕罕

即奴兒干

用兵之事實見載於皇

明實錄者實有未盡且黑龍江口特林之永寧寺碑屹然尙在  
非紀載當時偉業之證耶本書卷末所紀東北遼東交通道路  
有海西東水陸城站一節此即明人自開原北至哈爾濱附近  
以其地爲發軔更東北向松花黑龍二江沿岸而下出韃靼海

峽布設驛站之證依此所記以求驛站之遺跡尙可得十之六  
復考自開原東北繞長白山之北松花江之上源而出今之  
延吉自豆滿江南通咸境南道之驛站又可得十之七八而謂  
明人未涉其境所稱山川城站亦多在傳聞疑似之間誠誕妄  
之甚者矣故吾敢斷言本書之紀載遠及於滿洲東北陲之山  
川者不外永樂宣德二朝用兵之所致其時國勢之發展亦深  
足驚異至於景泰以降外難洊臻遂致中朝疆域不踰遼河流  
域今固無待贅述矣

本書之采輯故未甚備然所載重要之史蹟有二一爲義州西  
數里大陵河左岸之石窟寺本書云寺建於拓拔魏景明年依

此紀載曾至其地搜訪而史蹟尙不止此在其鄰地又發見魏太和二十三年之石窟寺一區嘗謂今之義州雖爲遼四之僻陬然在往代蓋爲自遼東以通於西方必經之大路也此種意度竟依此重要史蹟以證實矣其二爲旅順口黃金山下之鴻臚井井有刻石云唐開元某年鴻臚卿崔忻持節北使靺鞨途次於此地鑿井兩口永爲記驗大明一統志亦曾載其遺蹟惟不如本書之詳蓋一統志所紀乃采自本書進呈之稿本也夫遼東爲唐太宗高宗陳耀六師之地據此井石所記是崔忻之行程因幽州之道爲契丹所梗塞故自東萊渡海而往來於渤海之間得此井石可爲研史之助更無待煩言矣

大抵中國各代之起自西南者每不能保據遼河流域而有之  
其在遼東置郡縣者不過漢明二代而已漢之遼東郡雖與明  
之遼東都司疆域未必相同然僅其西陲與遼西及海道相接  
其餘三方悉鄰外族則大體相似惟明保有遼東久於炎漢其  
故何哉蓋常嘉隆之際武功文治俱有可觀不獨東南沿海之  
地治化鼎盛卽北境邊郡之域政治亦甚修明也迨至萬曆中  
年有三大戰役其與本邦之役

案此指平秀吉之役卽於遼東之鄰境

先啓衅端後廿餘載又與建州女真交戰女真不滿萬萬不可  
敵之語縱謂早成當年之讖然未踰歲遼河以東悉委敵手遂  
釀宗社被屋之禍豈非嘉隆以來累世之生聚早已殫於文祿

壬辰之會哉

按平秀吉年號文祿此云壬辰之歲爲萬曆二十年

由此觀之遼東志一書

雖謂爲漢人致力遼東最後之紀念亦無不可矣

毓猷按曩知有遼東志一書而未見傳本丙寅春間向金州

李東園先生詢之謂曾見是書而不能詳其本末夏間薄遊

長春市上於一雜貨攤瞥見是書以賤值購之喜出望外蓋

售者不知是書之可貴也清四庫全書中不收遼東志存目

中亦無是名康熙二十三年奉天府尹董秉忠初纂盛京通

志其凡例有遼東舊志草本舛謬尤多之語奉天府丞提督

學政張鼎彝序云舊有遼東志兵燹之餘無復蠹簡今按盛

京通志於襄平故城下云遼陽城西隅今定遼左右後三



衛治又於遼陽東嶽廟下云舊名垂興寺皆不注所出今檢  
遼東志皆有此文其他類此者不下數百事蓋董氏修志以  
此書爲藍本又取他書增益之復諱所出故一則曰遼東舊  
志草本一則曰無復蠹簡一若世無此書之傳本者其用心  
亦良苦矣高士奇扈從日錄云遼左舊志有古鐵嶺城在銀  
州東南五百里地接高麗洪武初卽彼地爲衛尋徙於此今  
檢遼東志亦有此文所謂遼左舊志卽遼東志也稻葉氏謂  
其所記間涉建州舊事四庫館臣懼觸忌諱故不爲之采進  
語尙不誣此書原爲日人大路道三名立所藏後歸前田利  
爲侯爵字松雲尊經閣大正元年重刊並倩稻葉君名崑吉字君山爲

撰解題一文當於明末流入日本吾國久不見此書乃以流入日本而僅存所謂禮失而求諸野者非耶 稻葉氏所撰

解題攷證精博雖中土之老師宿儒亦不能過其謂永樂中遼東都司采輯進呈之本爲大明一統志所取材殆爲定論

惟謂唐崔忻赴渤海之行程因幽州之道爲契丹梗塞故自東萊渡海則不無小誤考忻奉使之歲爲開元二年其時契丹尙未立國幽州之道亦無梗塞不過唐時遣使入渤海有水陸兩道一自東萊海道至旅順登岸一自幽州東北出長城取道何處一聽使臣之便此按之賈耽道里記而可知也

全遼志一書吾國亦無傳本稻葉氏謂彼邦舊紅葉山文庫

藏有是書近人吳承志撰賈耽道里記考實凡數引全遼志  
不知所見是何本豈卽日本舊紅葉山所藏者耶此書向無  
覆刻本近在大連圖書館見此書鈔本五卷缺第一卷蓋自  
紅葉山舊藏逡錄而來此極難得擬向其借鈔而覆刻之  
金人王元老有遼東行部誌鴨綠江行部誌二書滿洲源流  
考曾數引之是乾隆間猶有傳本乃未著錄於四庫而今世  
亦未見此書意其所紀必有爲他書所不詳者惜無從覓得  
之耳附記於此

扈從東巡日錄

扈從東巡日錄一卷清高士奇撰康熙二十一年正月仁皇以

三藩初平應詣山陵展祭以告成功士奇以供奉內廷扈從東  
巡二月啓程出渝關至盛京告謁編昭二陵又至興京告謁永  
陵又北行至吉林烏拉望祭長白山士奇於扈從時錄每日所  
見聞以成此書所論東北地理各事如謂由瀋陽至遼河之路  
原本泥淖難行太祖募夫修之始成坦途又發見金人婁室碑  
於英額門附近此皆他氏所不能詳者然謂今之烏拉街爲金  
之甯江州今之開原爲金之上京類此之抵牾舛誤者亦復有  
若干事茲取而一一辨之亦考古者之資也

廣寧城按遼史爲顯州奉先軍上節度本渤海顯德府地金時  
升爲廣寧府明改衛康熙三年設廣寧府附郭爲廣寧縣四年

廢府以縣屬錦州府

謹按渤海之中京顯德府在今吉林省境疑卽今之敖東城

詳敖東城條 去廣寧絕遠遼滅渤海後僑置顯州於此高氏謂爲

本渤海顯德府地非也

先是從瀋陽至遼河百餘里間地皆葑泥洼下不受車馬故自廣寧至瀋陽向以遼陽爲孔道太祖高皇帝初定瀋陽命旗丁修除疊道廣可三丈由遼河一百二十里直達瀋陽平坦如坻師旅出入便之疊道外仍多葑泥永安橋去今奉天府三十餘里側有新碑紀新修除疊道之工屹然在望土人名爲大石橋者是也

謹按遼金元明四代皆以遼陽爲重鎮出渝關而東經錦州  
廣寧以至遼陽爲往來之孔道曆五六百年未之有改也清  
太祖初得遼陽喜曰此天以遼陽授我也故亟爲定都之計  
後遷瀋陽祇云西征路直且近北征蒙古二三日可至而已  
至於五六百年來交通之孔道何以一旦而遽廢之則諸書  
紀載罕有言其故者迨讀此書始知其於遷都之後卽以平  
治道塗爲務化險爲夷改迂爲直開國規模誠有足多者已

元人葉隆禮遼志長白山在冷山東南千餘里

原注今按長白山在冷山西南六百

餘里白衣觀音所居其內禽獸皆白人不敢入恐穢其間以致蛇

虺之害

謹按葉氏遼志未見傳本長白山之得名由於山頂積雪終年不消彌望皆白非禽獸之皆白也或又謂山中草木皆白色亦爲妄談茲山固無木草亦甚少高氏以寧安境內之小白山當冷山故云長白山在冷山西南六百餘里實則葉氏之語本於洪忠宣松漠紀聞固不誤也

詳見冷山條

烏喇卽遼時甯江州混同軍觀察兵事屬東北統軍司金史太祖克甯江州降移燉益海路大彎照撒等敗遼兵於婆刺趕山趨達魯古城進攻黃龍府遂克顯州則甯江州在當時亦屬要地元滅金設軍民萬戶府五分領混同江南北明初內附後復各分其地我太祖高皇帝攻取烏喇地爲我有

謹按高氏之言非也吉林通志以今伯都訥城東南之石頭  
城子爲甯江州所在通鑑輯覽注亦云甯江故城在今吉林  
烏喇北混同江東尙得其似愚別有攷證已具於前篇

訪之士人云喇母烏稽在松花江東可百里許一日小烏稽烏  
稽者漢言大林也中皆喬松及樺柞樹間有榆椴鱗接虬蟠纓  
山帶澗蒙密紛糾白晝晦暝霜日葉凋略見曦月樹根亂石礫  
碓錯落疑無道路車馬過此爲之躊躇爲之屢顧矣人蘆生椴  
樹下翠蕤絳實爛然灌莽間行著穿林之東隅自厄黑木站至  
喇伐木站西南四十餘里皆林徑也喇伐東行六十里曰昂邦  
朵紅朶紅者渡口也又東四十里曰塞赤烏稽樹稠道峻倍於



喇母仰視天日安遼如在洞穴中行度六十里始得平原相傳呼爲大烏稽者是也又東四十里曰曷木迤邏其東北二百餘里有小白山巖岫嶽巖冰雪夏積疑卽宋洪忠宣公皓所徙之冷山也忠宣松漠紀聞亦云冷山去甯江州百七十里地苦寒多草木至八月則倒置地中封土數尺覆其枝幹季春出之否則凍死自曷木迤邏東行百里曰烏黑法喇有巨石黑色橫互十餘里車馬經其上作硜硜聲傳云下有海眼也又二十里曰必喇汗必喇又七十里曰沙林東南十五里曰火茸城金之上京會甯府也按金史上京路卽海古之地國言金曰按出虎以按出虎水發源於此故名金源取建國號稱爲內地天眷元年

號上京海陵貞祐二年遷都於燕削上京之號止稱會甯府大定十三年復爲上京領節鎮四防禦一縣一鎮一舊有會平州

天會二年築契丹之周特成也後廢其宮室有乾天殿慶元宮

天會十三年建辰居殿景暉門天眷元年建敷德殿延光門又有寢殿曰宵

衣書殿曰稽古又有明德宮明德殿金熙宗享太宗御容之處

太后所居也涼殿皇統二年構門曰延福樓曰五雲殿曰重明

東廡南殿曰東華次曰廣仁西廡南殿曰西清次曰明義後東

殿曰龍壽西殿曰奎文復有時令泰和武德薰風等殿興聖金德

宗所居永祚金睿宗所居光興金世祖所居等宮正隆二年命吏部郎中蕭

彥良盡毀宮殿宗廟諸大族邸第及儲慶寺大定二十一年復

修宮殿建城隍廟以甃束其城按虎水側建皇武殿爲擊毬校射之所雲錦亭臨漪亭爲籠鷹之所今其遺址漸致湮沒吳江吳兆騫天東小紀所載火茸城廣四十餘里中間禁城可里餘三殿基址皆在碎碧瓦碁布其上禁城外有大石佛高可三丈許蓮花承之前有石塔向東小敞出大城而西則芰荷彌渚逶迤綿渺莫窮其際渚間有亭榭遺蹟豈卽當時之闕庭苑囿邪聞之兆騫曰白沙林而東八十里爲寧古塔臨江而居以木爲城地極寒八月卽雪度清明冰乃解人勁勇重信義道無拾遺人不敢私鬪官民相習獄無枉繫宛然有陶唐氏之風焉自寧古塔東行六百里曰羌突里噶尙松花黑龍二江於此合流有

大土城或云五國城或云朝鮮北境近寧古者有安置宋徽欽  
故城在山頂南燼遺聞言二帝初遷安肅軍又遷雲州又遷西  
沔州又遷五國城其地去燕京三千八百餘里西上黃龍府二  
千一百里此城乃漢將李陵戰敗之地今以他書考之地里遠  
近不甚相合姑備載如此以俟後之考者

謹按冷山當在今吉林省舒蘭縣北慶嶺附近去希尹墓不  
遠按之距甯江州百七十里之里到亦合此所云小白山在  
寧安縣境去寧江州奚止三四百里之遠其誤必矣金之上

京高江村齊次風皆謂卽今寧安之火茸城

一名東京城

其說固

誤滿洲源流考謂在阿勒楚喀河之上源亦在疑似之間此

云以按出虎水發源於此故名金源似以呼爾哈河爲按出  
虎水同齊次風之說特未明言耳羌突里噶尙即今依蘭爲  
五國頭城之所在高氏說此尙不誤

去英兒門百五十里有大金壯義王完顏公神道碑高八尺八  
寸寬四尺五寸厚二尺二寸頂高三尺上鐫翰林院直學士中  
大夫知制誥兼行秘書監少監虞王府文學輕車都尉太原郡  
開國伯食邑七百戶賜紫金魚袋王彥潛撰文奉上大夫大名  
府路兵馬都總管判官飛騎尉賜緋魚袋任詢書丹額篆大金  
開府儀同三司金源郡壯義王完顏公神道碑其文備載婁室  
攻克黃龍府白水灤及與宋軍戰於太原汜水蒲解富平延綏

之功與金史所載無異末云卒於涇州歸葬於濟州之東南陝  
按金史隆州下利涉軍節度使古扶餘地天眷三年改黃龍府  
爲濟州以太祖攻遼大軍徑涉不假舟楫也直利涉軍大定三  
年嫌與山東路濟州同更名貞祐由此考之則英兒門亦屬黃  
龍府故地也考金史載任詢字南麓易州人慷慨多大節書爲  
當時第一畫亦入妙歷官北京鹽史年老致仕家藏法書名畫  
數百軸王彥潛姓名爵里俱不載別載王競彰德人由固安令  
召權奉翰林文字兼太常博士詔作金源郡王完顏婁室墓碑  
競以行狀盡其實請國史刊正之後遷翰林侍講學士擢禮部  
尙書其名其爵與此不符今碑文鑿鑿可據亦足徵金史之闕

略云

謹按柳邊紀略亦載此碑并云船廠西二百里薄屯山有金完顏婁室神道碑高八尺八寸闊四尺五寸厚一尺二寸頂高三尺南面鏤蛟龍其陰殘毀其陽篆二十字作五行碑身作楷書吉林通志金石門載此碑全文謂錄自柳邊紀略今小方壺齋輿地叢鈔中之柳邊紀略不載此碑全文或係節本也薄屯山在今雙陽縣北界土人謂之石碑嶺碑久亡失其隧道亦被開掘近年同人在彼立一祠中祀木主題曰女真開府儀同三司左副元帥完顏公之神位今舒蘭縣小城子地方之完顏希尹碑亦爲王彥潛撰文任詢書丹蓋王氏

爲當時大手筆故一代鉅製多出其手而金史無傳何也

按王彥潛之名金史凡兩見一劉蕤傳子仲詢天德三年賜王彥潛勝及第一豫王永成傳以太學博士彥潛爲府文學永成

師事之蓋彥潛爲金代狀元文名藉甚大定七年彥潛爲  
審王府文學潛王爲豫王之舊封十六年改虞王府文學

開原地屬挹婁唐貞觀中以其地爲燕州明皇置黑水州都督  
府後屬渤海爲上京龍泉府元時改爲開元路明太祖以其地  
置三萬衛又徙遼海衛於此成祖時於城內置安樂自在二州  
並屬遼東都指揮使司康熙三年始設開原縣

謹按漢之挹婁在北沃沮之北當今吉林省東北境唐明皇

置黑水府渤海爲上京龍泉府元爲開元路皆其地至明之

三萬衛始在今開原縣地去元之開元路所在不啻千里之



遠矣明人所撰遼東志大明一統志方輿紀要諸舊皆以吉  
黑二省地附入開原開原北境斥地至數千里之遠著者既  
未身履其地故語焉不復能詳高氏因譌成譌故爲此說疑

誤後學故具辨之

詳見黃龍府條

遼陽在春秋戰國時屬燕史記秦始皇二十五年使王賁伐燕  
滅之因置遼東郡於此漢高帝八年封紀通爲侯國漢末爲公  
孫度所據北海管甯王烈避地皆依之度死傳子康孫淵自稱  
燕王建元紹漢魏滅之及晉陷高麗後歸慕容垂子寶唐高宗  
征高麗得遼東城置遼州尋棄不守高宗時又取之置安東都  
護府後爲渤海大氏所有武后萬歲通天中爲契丹奚仲所逼

有乞乞仲象者度遼水自固武后封爲震國公傳子祚榮建都  
邑自稱震王併吞海北地方五千里兵數十萬中宗賜所都曰  
忽汗州封渤海郡王十有二世至彝震僭號改元擬建宮闕有  
五京十五府六十二州爲遼東盛國忽汗州卽故平壤城也號  
中京顯德府遼攻渤海拔忽汗城俘其王大譴譟以爲東丹王  
國立太子圖欲爲人皇王以主之葺遼陽故城以渤海漢戶建  
東平郡爲防禦州後遷東丹國民居之升爲南京城名天福高  
三丈設八門幅員三十里南爲三門壯以樓觀四隅有角樓相  
去各二里金時以爲遼陽府中東京留守司元時以爲遼陽縣  
明初以其地置定遼中衛及定遼左右前後東甯五衛並屬遼

東都指揮使司順治十年以遼東爲遼陽府內設遼陽縣十四年罷府治康熙三年改爲遼陽州甄登缺剝睥睨無存遼時故宮亦惟茂草颺颺不得過而問矣

謹按此文敘渤海國事雖語焉不詳亦小有抵牾以愚所攷大氏極盛時其國南境僅及開原至遼陽故地仍爲唐有此言爲渤海大氏所有爲沿遼史之誤一也史稱渤海爲海東盛國以其國境在今吉林省東部濱海之地故也此改稱遼東盛國蓋沿遼史以渤海國都在遼陽之誤二也忽汗城一名天福其故址卽今甯安縣之火茸城此謂遼陽城名天福亦沿遼史之誤三也遼史所敘遼東地理抵牾最多悉數之

而不能終其物若不細心求之鮮有不爲其所誤者

### 柳邊紀略

柳邊紀略一卷清楊賓撰沈歸愚國朝詩別裁集小傳云楊賓字可師浙江山陰人考安城爲友人累戍寧古塔可師赴闕訟冤得旨之柳條邊迎親歸作柳邊紀略塞外人稱楊夫子書法不染宋元習氣詩體專主沈著身後散如雲烟矣惟於其門人

處得塞外詩一冊所錄皆辛苦慘愁之音

國朝詩別裁集小傳

又吉林通

志寓賢門亦載楊氏父子之事其傳略云楊越字友聲初名春華浙江山陰人父蕃明京口副總兵越年十七補博士弟子員明社既屋散家資結客豪俠盈門將有所爲未果也其友以起

兵下獄密書乞援邏者獲焉逮戍寧古塔是時寧古塔號荒徼  
人迹罕到出塞渡湍江越穹嶺萬木排立仰不見人亂石斷冰  
與老樹根相蟠互不受馬蹏朔風狂吹雪花如掌異鳥怪獸叢  
哭林嗥行者起踣其間或僵馬上不得下攬其山川陰塞詭形  
殊勢多寓於詩既至見其人不常厥居俾斫木爲屋覆以其皮  
且炕牖之由是知室處出所攜布帛絲枲與易魚皮之屬由是  
知市賈又教以誦書作字暨禮讓之節於同遣者生養死葬及  
子女當婚嫁則助所不及所在化之惜楊夫子來晚云子賓徒  
時年十三康熙二十八年聖祖南巡至蘇州與弟寶泣血叩行  
在願率妻子代父戍爲駐輦問所由以罪重不允又號呼逐御

舟行數百里竄突於人馬蹂踐間衛士鞭箠雨下兄弟出強辭  
與抗幾斃卒不得達乃走戍所省視三十年越沒故事死謫戍  
不得還葬孥從行者留之賓衰服跪刑部兵部門號泣陳訴越  
四百五十有五日垢形骨立愴動行路當事爲求比例遂得請  
賓乃扶柩奉母范入關當柩發寧古塔其人設魚殮以祭者相  
屬於道而持寶號哭如送所親焉賓著有柳條邊紀略

吉林通志  
百十五

毓猷按吉林通志紀賓事頗詳惟未注所出檢國朝耆獻類徵

卷四百五十有楊越兩傳一爲王源撰一爲余懋杞撰越世居  
山陰之安城故號安城先生初名春華出塞後更名越其長子  
名賓字可師號大瓢沈氏小傳謂賓得旨之柳條邊迎親歸與

通志不同按此親字蓋爲櫬字之誤證以王余二傳可知其審  
沈氏又謂賓作柳邊紀略塞外人稱楊夫子語亦有誤邊人稱  
安城曰楊夫子又曰楊馬法馬法滿洲語猶長老也楊氏在甯  
古塔日久此書所紀皆由目驗與方輿紀要水道提綱諸書之  
出於懸擬者迥然不同故爲談輿地學者所引重然其中亦小  
有舛誤茲爲疏通證明博求至是他日有暇當取全書逐節疏  
證以爲攷求東北地理之助此文不能悉舉也

明時遼鎮建敵臺千三百三十三座路臺二百二十八座當初  
建時量地衝緩緩者五里一臺衝者二三里一臺路臺高三丈  
五尺周四十丈體圓以大甃爲之上置鋪樓垛口每臺設守軍

五名專納行旅居民之遇敵者也今自山海關至寧遠州依然  
星羅碁布完好若新自寧遠州至奉天府或五里一臺或十餘  
里一臺明啓禎朝爲  
大清所毀自奉天至威遠堡柳條邊則數十里一臺  
而又殘毀過半土人云天聰間增城奉天取材於此故也

謹按吾鄉敵臺遺址甚多土人通稱煙臺如大路煙臺小路  
煙臺高太煙臺等村皆是相傳爲唐代所築今讀此文始瞭  
然矣

黃龍府盛京志作開原縣按金史地理志天眷三年改黃龍府  
爲濟州而婁室墓碑載室葬於濟之東南奧吉里今其墓在船  
廠西二百里之薄屯山則當日黃龍府治應在今石頭河雙陽



河間又松漠紀聞黃龍府百餘里曰賓州州近混同江其說亦合若開原去混同江六百餘里金太祖安能一渡江卽據有之謹按楊氏之說是也特未能指明黃龍府故城爲今之農安耳然視高江村齊次風諸氏所說爲近是矣

船廠設於順治十八年昂邦章京薩兒吳代造船於此所以征阿羅斯也而萬季野以爲卽明永樂間船廠余聞前省中陳敬尹曰吾初至小吳喇尙無造船之命而穿井輒得敗船板及鏽鐵釘又井水或鐵臭

謹按遼東志云松花江上有河曰穩禿深山多產松木國朝征奴兒干於此造船乘流至海西裝載賞賚浮江而下直抵

其地此萬季野謂明永樂間於此造船之由來也穩禿河卽

溫德亨河源出吉林縣南境流百餘里至吉林城西門外入

松花江滿洲語溫德亨板片也

今盛京通志謂爲祝版之義蓋由於溫德亨山望祀長白

山神而附會此山以水得名祝版非其本義景武平云

茲河上流產木最富可以截成

板片順流而下故明征奴兒干清征羅刹皆於此造船也紀

載諸家於永樂年造船之事皆不能究其終始特爲徵攷如

上又吉林通志載今吉林城東十二里江邊阿什哈達有磨

崖字云奉天遣興孔兵馬陣前將軍遼東郡同都指揮使劉

書丁未十八年領軍至此洪熙元年領軍至此□□七年領

軍至此按語謂遼東設郡設於燕秦都指揮使司之設始於

明洪武八年此明官而仍題遼東郡蓋猶文士以古名施於  
今地之陋習耳又考洪武以後洪熙以前兩遇十八年皆非  
丁未丁未二字疑爲永樂之剝文考明史洪武二十六年遼  
東都指揮使司奏朝鮮招引女真五百餘人欲入寇蓋洪武  
永樂間嘗用兵於女真故領軍者得以至此也毓黻按丁未  
二字爲永樂之剝文誠無可疑而郡同二字亦爲都司之譌  
以丁未與永樂郡同與都司皆形似之字也明初遼東總兵  
有劉江見遼東志或卽其人奴兒干都司設立永樂九年其  
後叛服不常明實錄有永樂十二年閏九月命遼東都司設

此字疑  
有誤

兵三百往護其印之語據此則劉都指揮使之領軍

至此必爲征奴兒干而來也

冷山宋洪忠宣公皓所居余於必兒漢必拉北望相去約數十  
里積素凝寒高出衆山之上土人呼爲白山以其無冬夏皆雪  
也松漠紀聞冷山去燕山三千里去金所都二百餘里去甯江  
州百七十里扈從東巡日錄曷未迻邏即俄莫賀  
索落站東北二百餘  
里爲冷山

謹按楊氏之言非也辨已見前冷山條

混同江一名粟末河又名速末江又名宋瓦江又名松阿哩烏  
喇松阿哩者漢言天烏喇者漢言河言其大若天河也混同江  
之名改於遼聖宗四年其源發於長白北流遶船廠城東南出

邊受諾尼江東注北受黑龍江南受烏蘇里江曲折流入大東  
海其在船廠東南者濶三十丈余去時爲己巳十月二十一日  
江已冰乘車過是日晴和冰少融見土余疑爲江底土人曰江  
深三丈餘冰上積土土上復冰今所融者土上冰耳歸時爲庚  
午二月二十一日流漸蔽江鋒甚利舟不肯渡余策馬從亦拉  
江徑涉亦拉者漢言三也尼失哈站下流兩沙洲分江水爲三  
故以此名水僅沒馬腹余所乘高麗馬則沒頸因念金太祖乘  
赭白馬徑涉水及馬腹平平耳何神異之有

謹按今松花江冰畔之先雪融其上積潦縱橫遠望之如無  
冰也楊氏所見蓋猶此耳亦拉一作依蘭今惟江下游與牡

丹江會合處始有依蘭之名吉林附近固未聞有亦拉江之名也高句麗好大王碑叔其祖鄒牟王爲國人所追渡奄利大水有魚鼈成橋之異疑奄利大水亦爲松花江江水淺時本可褰裳而涉與金太祖涉松花江事同爲平平之事不身履其地不知也

古甯江州應在金厄黑木站扈從東巡日錄指爲大吳喇者非是松漠紀聞來流河去混同江百十里來流域卽在甯江州西金太祖紀十月朔克甯江州城次來流域可證今去混同江東百十里者正厄黑木站第不知何水爲來流河故蹟若大吳喇則在混同江邊

謹按楊氏之言非也辨已見前寧江州條

土人言遼金東京在今遼陽州非是攷金史地理志上京東至胡里改六百三十里西至肇州五百五十里北至蒲與路七百里東南至恤品路千六百里至曷懶路千八百里又洪忠宣路程上京三十里至會甯頭鋪四十五里至第二鋪三十五里至阿薩鋪四十里至來流河四十里至報打孛厓鋪七十里至賓州渡混同江則是金之上京確在今甯古塔之西混同江之東其去混同江僅二百六十里以今道里度之應在色出窩稽左右而色出窩稽嶺上土城址尙在今人指爲金時關門者安知非是然則沙闌之金碧猶存者其殆熙宗天眷以後之北京歟

謹按遼金二代之東京皆在遼陽土人語固不誤惟楊氏所

攷求者乃爲金之上京非東京也楊氏謂金之上京在寧古

塔之西去混同江二百六十里已較高江村所攷者爲近是

矣惟云在混同江之東色出窩稽

即今張廣才嶺

左右則亦有誤此

與滿洲源流考謂上京在阿勒楚喀河之上源皆爲稍得端

緒而又轉致迷罔者也今阿城縣城南之白城正在寧古塔

之西亦在混同江之南二百餘里故謂楊氏所攷爲近是也

至熙宗天眷後之北京大定府在今熱河朝陽縣之西細考

金史當自知之楊氏誤以爲遠在寧古塔則讀書換心之過

明時遼鎮邊外部落分爲二種在西北者曰三衛

三衛者秦能福餘朵顏也



在東北者曰女直

女直種三海西者爲海西女直建州毛憐置者爲建州女真極東最遠者爲野人女直

都司一曰奴兒干都司置衛三百八十一所二十四站七地面

七寨一 明末東北邊部落爲大清所并者三十有六海西則

有扈倫國之吳喇哈達輝發也赫建州毛憐則有滿洲之蘇克

蘇濟河渾河王甲董鄂哲陳蘇完鴨喇古長白山之訥殷朱舍

里鴨綠江野人則有瓦爾喀之阿庫里尼滿兀爾格陳綏分雅

蘭戶野兀爾機尼黑庫倫諾落河灣烏爾古辰虎爾哈之兀扎

喇綽庫禪能吉爾庫爾克之喇里闡鐸陳阿撒津多金兀庫爾

城掛喇爾額蘇里額爾兔黑龍江之葛爾達蘇薩哈連 東北

邊部落舉國內附者二十有六瓦爾喀則有蜚悠虎爾哈則有

格克里石拉忻那堪泰託科落羅努牙喇默爾車勒黑葉馬爾  
遮賴科爾佛科爾庫薩喀里松阿里則有擺牙賴黑龍江則有  
戈博爾塞布奇何黑岱克殷吳魯蘇榆爾根海輪固濃昆都輪  
吳藍精恪里渾泰使犬部則有蓋青窩稽則有那木都魯

謹按此三節敍列明末東北邊諸部及清初征服各部皆能  
舉其名稱多有爲清代官書所不詳者各部之所在地今已  
不能一一疏通而證明之矣惟愛新氏亦爲建州女真之一  
部茲不以之列入者尊本朝且懼觸忌諱耳

邊外文字多書於木往來傳遞者曰牌子以削木片若牌故也  
存貯年久者曰檔案曰檔子以積累多貫皮條挂壁若檔故也

然今文字之書於紙者亦呼爲牌子檔子矣

謹按今官署稱文卷曰檔案曰卷檔初本以書於木得名今則書於紙者亦曰檔讀此始可明其朔義

奉天多鄧將軍廟將軍名佐明成化間人四鎮三關志鄧佐者定遼前衛指揮使也善騎射有膽力巡撫王翱令署都指揮事成化三年春隨總兵施英按奉集堡遇敵二千餘佐率五百騎敗之復追至樹遮里峻山峭壁中鏖戰忽有一校策馬退走衆遂潰乃下馬步戰久之知不可爲遂自刎報未至遼人見佐乘白馬挾弓鼓吹而回佐家亦聞鼓吹聲守臣上其事立祠遼陽都御史吳禎爲撰碑記撫順境外部落凡有疫癘禱之立應至

今滿洲跳神皆祠之

謹按遼東志已載鄧將軍事與此略同

甯古塔地不計畝而計响响者盡一日所種之謂也約當浙江

田二畝零

謹按今吉林黑龍江兩省之地皆以响計一响十畝惟响之

用語微楊氏解說則不能知其原

遼太祖陵在廣甯縣中屯衛有大事遣一官致祭

謹按遼太祖葬於祖州之木葉山在今熱河林東縣境楊氏

之說蓋承讀史方輿紀要之誤

俗尙齒不序貴賤出遇老者於途必鞠躬垂手而問曰賽音賽

音者漢言好也

謹按松漠紀聞謂金人銀珠哥大王書牒尾稱塞痕者再塞痕好也疑此塞痕二字卽賽音之異譯今滿洲語固猶謂好曰賽音也

有孔和尚者名元昭江陰人素陰賊每挾私怨興大獄殺人流寧古塔者以百計余父其一也

謹按沈氏小傳謂賓父爲友人累戍寧古塔吉林謂其友以起兵下獄密書乞援邏者獲焉逮戍寧古塔蓋賓父豪俠任氣累於友人而致逮戍事屬實錄發其謀者或爲孔元昭故賓恨之刺骨也

盛京通志

盛京通志有四種刻本一為康熙二十三年奉天府尹董秉忠等奉敕修凡三十二卷一為乾隆元年奉天府尹王河等增修

凡四十八卷一為乾隆四十四年大學士阿桂等奉敕重修凡

百三十卷一為乾隆中敕修之簡本不記卷數

吾邑袁潔珊先生於此四種刊

本皆於都門訪蒐得之且於佐幕奉天時將百三十卷本重刊頒發各縣俾一方文獻與衆共曉厥功甚偉大連滿鐵圖書館

藏有鈔本康熙盛京通志亦可見原本流傳甚少

乾隆四十三年七月以舊本盛京通志敘事簡略體例亦多有

不合敕大學士阿桂等重修四十四年成書

吉林通志云四十八年敕撰失考

總纂劉僅之程維岳纂修滿臣五人漢臣六人皆非知名之士

故采輯未備考證不精其書分類三十有九曰聖製綸音天章

京城壇廟宮殿山陵星土建制沿革疆域形勝山川附古山川考城

池關郵津梁附船艦戶口田賦附八旗官莊稅課職官學校官署選舉兵

防名宦歷朝人物國朝人物忠節孝義文學隱逸流寓方伎仙

釋列女祠祀古蹟附陵墓風俗物產雜志歷朝藝文國朝藝文稍

失之細碎若加以整齊宜併為十六類一曰聖訓志又宜改稱詔諭志

凡聖製綸音天章皆併入之二曰沿革志仍前建置沿革一類

但須博攷而詳說之萬不能潦草從事三曰方域志敘各縣里

到形勝而以疆域形勝星土兩類併入之四曰城邑志以京城

城池壇廟山陵宮殿諸類併入之五曰山川志仍原書山川一

類而以津梁一類附入之六曰民政志專敘農田戶口水利諸

政以原書田賦併入之七曰職官志仍原書以官署併入之

併或

入城  
池志

八曰選舉志仍原書以學校併入之九曰武備志即原書

兵防一類十曰人物志內分名宦鄉賢流寓列女

附方伎  
仙佛

四子

目而以原書名宦以下十一類併入之十一曰藝文志仍原書

十二曰祀典志仍原書併以壇廟山陵之一部附入之十三曰

風俗志仍原書十四曰物產志仍原書十五曰古蹟志仍原書

更附以金石一類此類宜博加考證以求其真十六曰雜志

或曰  
志除

凡各類所不能載者胥歸此類再於其首冠以總略附以圖表

則視舊志整齊多矣然此猶就清代舊制言之耳以今日言則



聖訓志宜分入武備藝文各志不必自爲一類此蓋因時而異者也李次青云古之地志載方域山川物產而已元和郡縣志頗涉古蹟蓋用山海經例太平寰宇記始及人物藝文皆絲輿地推廣及之者也夫有土地然後有人民政事法當以地理爲本此溯源之論也謝蘊山則以省縣志書爲一方之史所撰廣西通志特起義例分表典略錄傳諸門一如正史此又末流之變也李氏之論可取而謝氏之法亦可師探源者研理而得真沿流者隨時以適變二者固不可偏廢也盛京通志分類雖失之細碎而其禮例仍如李氏之說以地理爲本者於志書通例尙無乖舛若再加之整齊補其疏漏正其譌誤則成完書矣

民國十年奉天省當局有創修奉天通志之議擬延張仙舫先生之漢爲局長世仁甫先生榮爲總纂後以他故中輟十三年重提此議擬延袁潔珊先生主其事先生遲回未就毓猷曾作書促成之並論修志方略事終未就書曰側聞奉省當局欲以修志事延公主持議將定矣乃公猶以任重款絀致其遲回竊謂此無所用其遲回也記曰凡事豫則立不豫則廢夫所謂豫者先事而謀謀定後動是已譬之築室必先召工師相地繪圖而後能議及鳩工庀材也修志之事重於築室其宜先事而謀者又什佰倍於相地繪圖也其必豫立定程以爲纂輯之基礎不待言矣馘愚以爲修志宜先定大綱大綱之事得深通志學

者三五人而詳議之期以半月可望歲事大抵通志之體有二  
一曰方志爲地理之書但悉心於方域山川物產則其事已竟  
人物藝文則由輿地推廣及之非志書之本職也一曰志書爲  
一方之史不惟方域山川在所宜詳凡有涉於一方之文獻者  
皆宜入錄故有紀有傳有表有志一如史體由前之說則范成  
大吳郡志康海武功志其選也由後之說則謝啓昆廣西通志  
畢沅湖北通志其濫觴也二家之說各執其是往者戴東原章  
實齋二氏且曾以此釀爭矣敝則竊有取於後者之說以其體  
大而思精也志書載一方之事方域山川固重已而文獻尤重  
方志而不載文獻後世何以徵焉凡著書之體有一成不易者

有因時制宜者方域山川人物藝文因爲應有之科然如皇言  
符瑞則後此作志者所宜省併也而今世新政多爲前代所無  
宜增入者又非一事矣體例既定次宜及蒐集之方纂輯之法  
蒐集之方於古事則博攷載籍於今事則實地徵訪盛京舊志  
倉卒成書疏舛間出於其可取者則取之不足則證以他書聞  
北京清史館藏書最富近年發見清初內閣老檔所載滿洲舊  
事尤多宜遣通博之士二三人特往檢攷遇則鈔之不厭其詳  
度必有珍聞軼事爲外間所不及知者此一事也曩者開局修  
志率以公文向各縣徵取事類各縣迫於程限咄嗟立辦其言  
不盡可據或虛構事實以欺其上故可採者絕少亦宜選通博

之士分赴各縣實地徵訪於他人有一二分之見者其人則有十分之見則事實之被遺棄者少矣此又一事也蒐集既畢繼以纂輯先爲長編務求詳備然後博訪通人請其審定去取則成書非難事矣歟謂成書之限定以三年第一年蒐集事類第二年纂輯長編第三年勒成定本如此爲之則五六萬金可辦奉省當局果欲成此一方大典亦何恡此茈茈之數耶是在公之潛移默運而已故曰無所用其遲回也歟於近二年來究心方志東北文獻考求尤劬見聞不廣所得甚微愚不自揆欲師汪容甫廣陵通典之成法勒成一書有聞必錄不拘體例以爲他日修志之助志業不副迄用無成甚可歎也今聞公發願修

志深幸主持得人聊將所懷攄貢一二管窺蠡測無補高深惟望有以教督之幸甚

遼東先正著述攷

涼書十卷

高謙之洛陽令崇之子官國子博士

以上北魏

龍山集□卷

劉仲尹

王子端文集四十卷

王庭筠

王子端秋山應制詩不分卷

同上凡三十餘首

蒙辨十卷

同上一作蒙談

乙未麻卷

耶律履

耶律文獻公集十五卷 同上

如菴小彙 詩三百首樂府一百首壽孫按  
孫一名璵字子瑜金世宗之孫

以上金

湛然居士集三十五卷文集十四卷 耶律楚材

懷軒集三十卷 耶律希亮

以上元

邊城吟稿□卷 畢恭按  
前屯衛人

裔菴稿□卷 張升按  
定遼中衛人

醫閭集九卷 賀欽

養正篇□卷 孫磐

小四書□卷同上

養蒙大訓□卷同上

復菴詩集□卷王春甫左屯衛人按春廣

以上明

撫江集□卷蔡士英

督漕奏議□卷同上

滕王閣集□卷同上

趙清獻公奏議□卷趙廷臣

彙草辨疑□卷甘文焜

范忠貞公集十卷范承膜苦吟畫壁時浙閩奏議數種百



宋元詩律選□卷

吳與祚作宋元聲律選按一

史遷句解□卷同上

粵東輿圖□卷同上

留村詩稿□卷同上

通鑑本末紀要□卷蔡毓榮

蘊真軒小草□卷蔡季玉撰毓榮女高文良公繼室

治河書十二卷斬輔

斬文襄公奏議八卷同上

通志堂集十八卷納蘭成德

通志堂經解□卷同上

全唐詩選□卷同上

詞韻正略□卷同上

棟亭詩鈔八卷詩鈔別集回卷文鈔一卷詞鈔一卷詞鈔別集

一卷曹寅

梅翁集□卷修法海

與梅堂遺集十二卷詩十卷詞一卷雜文一卷附耳書一卷鮓話一卷修世

思

爾爾齋詩存□卷修鉞按鉞字秉虔一字純三世思子官葭州知州

冬白堂詞□卷修世南

沓渚集□卷修鏞

西清載筆錄□卷 修介福

退思齋詩□卷 同上

野園詩集□卷 同上

留都集□卷 同上

關中紀行草□卷 同上

采江小草□卷 同上

塞上集□卷 喻成龍

通鑑參注□卷 范成勳

雞足山志□卷 同上

世美堂集□卷 同上

文廟從祀先賢先儒攷郎廷極

勝飲編□卷同上

集唐要法□卷同上

旗軍志一卷金德嘉 按此書曹  
倦圃輯入學海類編

讀易草□卷于養志

西征集□卷同上

公餘詩草□卷卞三元

式古堂集□卷卞永譽

式古堂書畫彙考□卷同上

來遠堂集□卷卞永吉

雛鳳堂集□卷

范承烈

在園雜誌四卷

劉廷璣

葛莊編年詩十三卷

同上 後又合已刻未刻總  
為葛莊分類詩鈔十四卷

隙光亭雜識六卷

揆敘 楊鍾義  
刻入留培叢書

益戒堂詩集八卷後集八卷

同上

雞肋集一卷

同上

撫苗錄□卷

鄂海

味和堂集六卷

高其倬

石堂詩鈔□卷

高格 按格為其倬之子

視學測算□卷

年希堯

刀圭面體□卷同上

比例便覽□卷同上

對數廣運□卷同上

萬數平立方表□卷同上

算法纂要總綱□卷同上

集驗良方□卷同上

守素堂詩集□卷蔡琰

西林遺稿六卷鄂爾泰

德蔭堂集十六卷阿克敦

蘭雪堂集□卷岳禮

清虛齋集□卷 鄂忻

閒青堂集十二卷 疏二卷詩十卷 朱倫瀚

拳石堂集二卷 達禮

原易三卷 李鏞

春秋通義十八卷 同上

尙史七十卷 同上

曉巢集六卷後集一卷 同上 文集十卷未見 又有

清齋詩藁□卷 李鉉

居白室詩集□卷 陳景元 按八旗通志石閭詩一卷陳景元撰 又按袁潔珊先生近在京師見石閭詩鈔數卷

慶芝堂詩集十八卷 戴亨

雷溪草堂詩不分卷 馬長海

道腴堂全集□卷

鮑鈔 按鈔所著書曰道腴堂詩編 亞谷叢書稗勺合之為全集

靜廉堂集□卷

顧琮

固哉草堂集□卷

高斌

積翠軒集□卷

高述明

陶人心語五卷續選十四卷補遺一卷

唐英

受宜堂集四十四卷

常安 楊鍾義云受宜堂者官山西時世 宗憲皇帝以潛藩降香五臺所賜奎壘也

及撫浙遂以名其集其子曰曰瀚海前後集者乾隆元年由江 詩餘一卷官黔時所刻也

西入都命醫理北路糧餉駐鄂爾昆時所集也曰潘水三春 集者文九卷詩三卷四年授盛京兵部侍郎後所作也

餘翦燭集者文九卷詩五卷五年內召改刑部左侍郎時所 編也曰淮集者文七卷詩五卷五年冬至六年多官漕運



總督時  
所作也

廿 史文鈔一百九卷 同上

古文披金二十四卷 同上

尹文端公詩集十卷 似尹繼善○按公子慶蘭字以村諸生有絢春園詩鈔

椿蔭堂詩文存稿 楊口口高祖所著名氏未詳

補亭詩稿□卷 觀保

澄悅堂集十四卷 國梁

來鶴堂集□卷 于宗瑛

海愚詩鈔十二卷 朱孝純

嘯崖詩存□卷 甘運源及其弟逆瀚五人合運源在松願邦英王

習靜詩文集□卷鯨圖

嘉興府志八十卷伊湯安

黑龍江外紀八卷西清

香湖文存一卷詩鈔二卷李堯文

繩樞齋集□卷蔣攸銛

黔軹紀行集□卷同上

期不負齋集□卷文祥按此為倭文端公代作

妙香館集□卷銘岳

懷古田舍詩鈔□卷徐榮

敦教堂詩鈔□卷官文

寶文靖公詩集□卷 寶盞

麒莊敏公詩集一卷 詞一卷 麟慶

窺生鐵齋詩存一卷 詞一卷 宗山

希晦山遺文一卷 雜箸一卷 同上

梅蘊詩鈔□卷 陳良玉 嶺人道光 按良玉字朗山 鐵嶺人 官教諭

虞苑東齋詞鈔□卷 同上

竹園詩集一卷 張廷弼

春暉堂詩鈔□卷 張廷枚

同遊千山詩錄一卷 王爾烈 按又有遊千山詩一卷 皆先生手錄 未付刊

湖山雜咏一卷 王緯 按緯字象文 瀋陽人 官錢塘知縣

性理修身說□卷修景文

綱齋雜記□卷同上

九梅村詩集二十卷魏燮鈞 鐵民 鐵嶺 按燮鈞字子亨號

于中丞遺書□卷于蔭霖

仙樵詩鈔□卷遼陽人 劉文麟 按文麟字仁甫號仙樵

自娛集□卷劉兆所 字青門 按兆所

西岡詩草□卷馬琿 字林 按琿字仲 玉號 西岡 道光時人

西池賸草二卷馬瑤 字林 按瑤字號 西池 瑤林之 弟所著 一稱鋤月山房詩文集

毛詩多識十二卷張玉綸 按玉綸 遼陽人 道光年舉人

擊楫集一卷李葆恂 按葆恂字文石 義州人 子和制軍之子

讀畫詩二卷

同上

燃犀錄十卷

同上

猛菴文略二卷

同上

三邕翠墨菴題跋四卷

同上

偶園讀書志二卷

同上

猛菴雜著二卷

同上

舊學庵筆記一卷

同上

庚癸小草一卷

同上

紅羸山館遺詩一卷

同上

津步聯吟集一卷

同上

容齋詩草

口卷 錫鈞 按錫鈞 潘陽人 清季 官翰林學士

學敬齋遺稿一卷

李文毓 按文毓 一名 學朱字組 珊 遠陽人

宋星五遺著二卷

宋玉奎 按玉奎 字星五 遼陽人

以上清

右北魏金元明清五代遼東先正著述都百五十一種其有

傳本為愚所見者凡三十餘種其原書已佚或有傳本而未

為愚所見者約百二十種佚者居十之八存者僅十之二凡

著錄之書胥先正心血所注精神所寄而有存有不存且有

并其書為何名而不知者甚矣著作之難也今世論者謂遼

俗樸儻人不知學輒鄙夷之以為不可與道古而愚曩習聞

是說弗加深考因亦謂然不知達人材士前後項背相望而等身之著作亦林總不可僂指也孔子曰十室之邑必有忠信十室且然况壤地千里之廣乎特無好事者爲之羅列駢舉粲然畢陳遂使後進之士羨他人之寶藏津津樂道而忘其家珍不數耳不爲樹之圭臬何以啓其觀感此是篇之所以作也抑又聞之引端爲竟緒之資舉一有反三之益是篇箸錄之書不過僅就所知粗舉厓略其闕遺而不舉者不知凡幾此非假以時日博訪周諮無以窺其全豹也補闕輯佚

請俟異日

遼東文獻徵略卷八

遼陽金毓黻撰

雜錄第六

清建國考

世系

汗號

國號

清初祖世系表一

一 據東華錄



景祖覺昌安——顯祖塔克世——太祖奴爾赫齊



清初祖世系表二 一 据明實錄及  
明人典籍

阿古

猛可帖木兒

即孟特穆建  
州左衛都督

董山

即充善左  
衛都督

脫羅

即安羅左衛  
都指揮同知

凡察

建州右衛  
都督同知

童倉

李撤赤哈

疑即  
錫寶

兀升哈

疑即  
福滿

叫場

即覺  
昌安

他失

即塔  
克世

太祖

吳江陳去病

佩忍

著明清最初交涉史其所取材以明陳仁錫

皇明世法錄爲多謂猛可帖木兒與猛特穆決係一人董山即

充善猛特穆之子也脫羅即安羅充善之子李撤赤哈即錫寶

齊蕭古亦充善之子滿洲世系肇祖孟特穆有二子名充善褚

宴褚宴無嗣充善則有三子曰安羅曰安義謨皆無嗣曰錫寶  
齊蕭古生子名福滿卽興祖也皇明世法錄載正統二年建州  
左衛都督猛可帖木兒爲七姓野人所殺又稽之明人典籍稱  
董山驕橫背叛屢盜邊塞卒爲朝廷所誅旋授其子脫羅爲指  
揮給以敕印又嘉靖二十一年建州夷酋李撤赤哈入寇二十

四年就禽梟塞其大略如此

日人稻葉君山清朝全史敘清初祖世系最詳茲不具引又近人孟森心史史

料有清朝前紀一篇大抵取材於稻葉氏之書復雜引他書以補其未備所論與陳氏亦無大出入

餘杭章太炎先生清建國別錄云清寶錄稱范察再傳至肇祖  
孟特穆孟特穆生充善充善生錫寶蕭齊古錫寶生興祖福滿  
興祖生景祖覺昌安景祖生顯祖塔克世顯祖生太祖太祖上

至肇祖六世然崇德追王不及充善錫寶也順治祭告天地文  
稱追崇太祖以上四世高祖澤王爲肇祖原皇帝曾祖慶王爲  
興祖直皇帝祖昌王爲景祖翼皇帝考福王爲顯祖宣皇帝於  
充善錫寶雖尊親系屬亦削之今興京永陵亦惟四世其齟齬  
如此蓋其始譜牒不具傳之口耳橫以充善錫寶置肇興二祖  
間後悟其非乃追正之也近人或以孟特穆當猛可帖木兒以  
充善當董山以錫寶之兄妥羅當脫羅若是則清不祖范察而  
祖猛可帖木兒也范察行事最顯清人以爲祖必無誤不得移  
以屬他人孟特穆於猛可帖木兒爲從孫不得混爲一人充善  
之音似董山妥羅之音似脫羅清初或以孟特穆爲猛可帖木

兒遂取充善父子以承其世及後始更正夫文字彼此無定是陵墓則縱跡可尋也孟特穆福滿父子中朝所以不見者以其未襲職清稱都督者或嘗贈如子孫官邪

統猷案陳章二氏之說兩相抵牾竊以陳氏之說似覺可信何以明其然也清初建號之後追崇孟特穆爲肇祖原皇帝明其爲受封之始祖也攷明實錄猛可帖木兒始官建州左衛都督以上無考其後累世相襲不爲都督卽爲都指揮或都督同知皆爲尊官明實錄所稱之凡察爲肇祖之同母弟後官建州右衛都督同知與肇祖之子董山分掌左右衛董山遞傳數世至太祖世官左衛統系甚明何能以右衛之范察爲祖至清實錄

稱范察再傳至肇祖之范察則非領右衛之范察東夷之俗孫襲祖名容或有之章氏之誤在認定清當以范察爲祖不知范察之世年代繇遠事迹無考且未爲王朝官不若肇祖之秩尊故清初追王不上及范察事甚彰著至若董山之爲充善脫羅之爲妥羅音既極近世乎又合更無致疑之餘地今興京永陵惟四世墓充善爲明人戮於廣寧實錄記載甚明錫寶蕭齊古陳佩忍斷爲李撤赤哈亦爲明人所戮度此二世不得歸葬建州故永陵無其墓又不得以此致疑無充善錫寶二世也

據京兆忠

紉齋孝廉云永陵只葬與景顯三祖實無肇祖蓋肇祖既爲七姓野人所殺或竟不得全其首領以正丘首孝廉前官興京知府會親至永陵其言當可信以此證章氏

之言爲不誦

再以其世攷之清肇祖於宣德九年爲七姓野人所殺

下至萬曆四十四年太祖建元天命之日相距一百七十五年

董山於正統三年襲任指揮成化三年爲明人所執戮於廣寧

下至天命建元之日相距一百三十九年萬曆十一年景顯二

祖在古勒城爲明兵所殺其時上距肇祖被戕之日爲一百四

十二年距董山被戕之日爲一百十六年此一百十六年之中

計凡安羅錫寶蕭齊古以弟繼兄爲一世興祖景祖顯祖五世一世以

二十年計之正得百年由此可推知猛可帖木兒必爲肇祖充

善必爲董山也章氏謂順治祭告天地文稱追崇太祖以上四

世稱澤王即肇祖爲太祖之高祖似足證明興祖爲肇祖之子然

崇德元年稱追尊始祖爲澤王王氏東華錄崇德朝執此證之順治時所

稱高祖明係始祖之誤始祖與高祖即與其間必隔數世其曰

追崇太祖以上四世不必定爲父子相次之四世黃道周博物

典彙謂顯祖他失即塔克世爲李成梁鄉導討王杲成梁相其爲人

有反狀基之以火攻陰設反機以焚之時奴兒哈赤甫四歲成

梁不能掩他失功哭之盡哀撫奴兒哈赤即太與其弟速兒哈

赤即太祖舒爾哈齊如子奴兒哈赤十六歲始出之建地故其兵端以

復讐爲詞据此則景顯二祖被殺時實爲嘉靖四十二年是年

太祖年四歲上距董上被戮之年僅九十五年耳以余所聞於

故老者太祖幼年曾爲李成梁侍者後竊其祖父之骨逃歸建

州即興京置骨於樹巔雨後視之已合抱於樹中不復能取因葬

於是是謂永陵今永陵有所謂神樹者是也李成梁兩次鎮守  
遼東歷三十餘年人皆呼爲李總兵博物典彙所紀似近情實  
章氏所論殆於此節未之深考歟

### 右論世系

盛京通志天章門清高宗乾隆四十三年至盛京詩自注云太

祖既遷都瀋陽至太宗遂即帝位建國號規模大定

卷十

按此

語出高宗自述必爲實錄而太祖雖建元天命儼然開國稱孤  
而未建帝號則可斷言尋東華錄天命元年衆貝勒議上尊號  
奉表勸進尊上爲覆育列國英明皇帝建元天命据此是太祖  
已有皇帝之稱而高宗之言何以與東華錄不符殆必有故茲



以東華錄本書考之天聰十年

五月以後改元崇德

夏四月內外諸貝勒文

武羣臣上表請上稱尊號壬午上齋戒三日設壇德盛門外乙

酉黎明祭告天地受寬溫仁聖皇帝尊號建國號為大清改元

崇德追尊始祖為澤王高祖為慶王曾祖為昌王祖為福王上

太祖尊諡曰承天廣運聖德神功肇拯立紀仁孝武皇帝廟號

太祖太后尊諡曰孝慈昭憲純德貞順承天育聖武皇后

高宗故宮

用唐太宗幸武功慶善宮勸詩自註云太宗功德隆盛混一蒙古征服朝鮮又得玉璽符瑞於是諸貝勒大臣外藩蒙古台吉及漢人文武各官奉表請

上尊號再三請始得允乃於天聰十年四月築壇德盛門外即皇帝位建國號大清改元崇德

此所紀者與

高宗詩注之語若合符節愚謂清太祖肇迹興京雄長一部當

建元天命之際不過始稱汗號為滿洲一國之主

至今故老相傳猶稱太祖

爲老汗王其云上尊號曰覆育列國英明皇帝者乃後代史臣就當

日滿語譯義而得其約略非必有皇帝之稱也詳攷載籍可得數證常太祖建元天命之時未聞有覃封列祖推恩佐命之舉即使禮文簡略此等大事斷乎不容疏漏而太宗卽位稱尊之際則首事於此兩相印證可知太祖未建帝號一也太祖薨逝太宗嗣位僅率貝勒大臣告天行九拜禮以明年爲天聰元年其他儀文一無所紀如太祖已建帝號則太宗嗣位之初卽應追上尊諡崇以廟號奚必待十年後而始議及於此若子稱帝號而其祖若父不獲崇封不加歆享爲人後者何以自安滿洲雖未染中俗而於此大節不能不知二也自古身膺帝號者妻

必稱后此定制也太祖之妻先後娶三人皆稱太妃迨太宗即

帝位始追尊其母為孝慈武皇后以妻例夫亦可證太祖未建

帝號三也太宗於即位後始立皇后天聰間未有是稱東華錄天聰元年袁崇煥與太

宗書首云遼東提督都院致書汗帳下是太宗未即位前稱汗

而太祖之稱汗不稱帝又不待言高宗撰三韓訂謬亦云國語

及蒙古皆謂君長為汗此亦一證清之初祖曾臣於明袁氏與

太宗書固無稱其為帝之理然滿洲既建號為汗從其實而稱

之亦不乖於理且袁氏方欲修好於滿洲措詞宜婉降其稱號

亦於勢不順此亦可與高宗之言互相印證者也茅瑞徵東夷考略王在晉三朝

遼事實錄稱太祖致朝鮮檄文稱金國汗近年北京發見之內閣老檔有太宗天聰四年伐明誓師諭自稱金國汗此皆稱汗之證

右論汗號

清初以大金爲國號有數証盛京撫近門

俗稱大東門

外甕兩門內

額皆鐫文曰大金國天聰五年孟夏造十字證一盛京清戶部

門榜末署曰大金國天聰二年戴葵甫金伯衡貴和墳三君皆

及見之自戶部廢其地改建學務公所舊榜早毀滅無存矣證

二金息侯於民國七年得盛京故宮老檔一百七十九冊分紀

天命天聰崇德三朝事爲太祖太宗實錄開國方略東華錄所

不載原爲滿文經滿漢文學之士十餘人譯成百卷清初稱金

卽見此檔故徐菊人序云開國實錄本紀累有修改時秉筆者

刪語過多甚於國名其他可知卽謂此也

詳見瓜圖叢刊

證三章太炎

先生與弟子吳承仕書云內閣檔案目錄有太宗天聰四年伐  
明誓師諭自稱金國汗又云太祖本稱後金國汗據茅瑞徵東  
夷攷略王在晉三朝遼事實錄所錄太祖致朝鮮檄文言之如  
此今觀朝鮮諸史崇德以後稱清崇德以前稱金詳見華國月刊證四  
稻葉君山清朝全史所列大金國號之證據於撫近門額之外  
有遼陽之喇嘛墳大石橋之娘娘廟碑東京城之扁額皆有大  
金某年字跡當由目驗而得清朝全史載一喇嘛法師碑全文  
末署大金天聰四年歲次庚午孟夏吉旦建或卽遼陽之喇嘛  
墳也

右論國號

清建國別記

奴酋

博物彙編第二  
十卷四夷門

明黃道周

奴酋卽金餘孽也元滅金以其地置軍民萬戶府國朝分爲  
二種曰建州卽奴酋祖地曰海西曰野人而建州實居中雄長  
地最要害永樂元年野人酋長來朝已而建州海西悉境歸附  
設建州等衛所二百餘置都司一曰奴兒干以統之官其酋自  
都督至鎮撫有差惟野人以絕遠貢無常期其建州海西定每  
歲以十月驗放入貢仍設馬市開原城是時建州衛指揮阿哈  
出及子釋家奴皆以有功賜姓名而釋家奴弟猛哥不花亦以  
內附故俾領毛憐衛累都督同知父子兄弟光寵於時此建州

之始大也正統初建州衛都督猛可帖木兒爲七姓野人所殺弟凡察子童倉逃之朝鮮併失亡其印於是稍衰矣時童倉弟董山嗣爲建州衛亡何凡察童倉歸建州朝廷存繼絕之義詔更與印比得故印凡察輒匿更給者乃更分建州左衛置右衛剖二印令董山領左凡察領右而夷性故驚蹶自此益驕輒誘北虜入寇不絕殺掠遼東吏民無算景泰中巡撫王翱遣使詔諭稍歸所掠復款關然七姓之亂諸酋多死子孫失其賜勅不得官以舍人入貢賞賜大減益失望董山糾毛憐海西諸夷盜邊無虛月成化二年遣都督武忠往諭檄致董山卽奴兒之祖先羈廣甯尋誅之命靖虜將軍趙輔督師三道入搗其巢捕斬

首虜過當築撫順清河髮陽諸堡邊備日嚴夷稍削乞款貢而  
朝廷亦欲與之休息令董山凡察後皆得襲諸從叛者視先世  
遞貶一官諸夷雖復貢然時時以報董山讐爲辭往來患苦塞  
上會大璫汪直方倖功用事巡撫陳越揣其意疏言建酋連結  
海西名雖屏蔽實懷獸心宜大發兵創之乃以撫寧侯朱永爲  
帥副直行襲破之頗有斬獲而虜益憤怨深入焚掠慘於往時  
開原廣寧之間騷然煩動矣居久之其酋完者禿貢馬乞入謝  
許之諸酋復奉貢請襲如故迄正嘉間塞上得息嘉靖二十一  
年建州李撤赤哈等入寇巡撫孫繪禦之失亡頗多亡何撫臣  
於敖坐減賞物夷大譁更詐殺譁者夷由此挾忿數入寇殺掠



如成化時遼之東西幾困已復稍輯至萬曆廿八年建州奴兒哈赤襲殺猛骨孛羅其勢始悍猛骨孛羅者與那林孛羅俱海西部落與奴酋之家俱封龍虎將軍猛最忠順虜或入犯輒預報得爲備諸酋皆心惡之奴酋尤甚會猛酋與那酋相仇殺猛力不支請採於邊吏不許願得乘障扞一圉不許遂求援奴酋奴酋悉起以援爲名襲執之時邊臣遣使請採奴酋外恐吾聲罪實心利其妻妾部落乃僞以女許猛酋長子送次子歸我內地以苟塞前請說邊臣亦因循不與較奴酋自是有輕中國之心又先是奴酋父塔失有膽略爲建州督王杲部將杲屢爲邊患是時李寧遠爲總鎮誘降酋父爲寧遠嚮導計杲出奇兵往

返八日而擒呆酋父既負不賞之功寧遠相其爲人有反狀甚之以火攻陰設反機以焚之死時奴兒哈赤甫四歲寧遠不能掩其功哭之盡哀撫奴兒哈赤與其弟速兒哈赤如子奴酋稍長讀書識字好看三國水滸二傳自謂有謀略十六歲始出之建地故其兵端動以報復祖父仇爲辭日與其弟厲兵抹馬設險擺塘自三十四年貢後以勒索車糧爲名遂不復貢時擁衆要挾憑陵開原邊臣噤悸莫可誰何原奴酋之寨在甯官塔舊址二面臨河一面阻山其城係磚石包砌重圍奴居內城隨住夷人三百餘家皆親黨心腹外城住夷約近萬餘家皆是挑選精壯者其遠近環寨散處之夷約有數十萬之家其地界南隣

朝鮮義州橫江爲界離江有一千餘里江外有十四道灣係忽喇戶故址皆爲奴併又有王兀堂王寧古鐵等夷亦爲奴所併西隣長奠永奠大奠寬奠新奠靉陽孤山鹹陽一堵墻清河散羊峪馬根單撫順三岔兒白家衝撫安柴河松山靖安威遠鎮北關北有混同江烏龍江白石江江內先有灰扒伯答里等夷皆被奴酋襲殺擄掠部夷八千餘衆悉入奴地另設置建夷千餘家屯種此地又有海西夷南關舊址大黑山地方亦併入奴酋近屯兵二千餘家在此住牧初酋一兄一弟皆以驍勇雄部落中兄弟始登壇而議旣則建臺策定而下無一人聞者兄死弟私三都督酋疑弟二心佯營壯第一區落成置酒招弟飲會

入于寢室，鐔鎗之注，鑿鍵其戶，僅容二穴，通飲食，出便溺，弟有  
一名，裨以勇聞，酋恨其佐弟，召入宅，腰斬之，長子數諫，  
酋勿殺弟，且勿負中國，奴亦困之，其兇逆乃天姓也，然奴雖叛，  
賊大都有氣，昔噶承恩入京，襲父官司馬吏，故難之，噶誼十大  
司馬前有司馬，屬官異其相，擬明日置酒呼之，酌而是夜已去  
矣，奴酋氣亦頽，噶蓋未嘗一日忘父仇也，九邊虜俱不毛，唯建  
夷產珠及參與貂，最下赤松子界鴨綠江，而居珠江，出也，其魚  
最肥，又東北走數千里，爲生虜，中國徒知其幅員三千里，不知  
東北數千里，戰敗度可匿，形東多茂松，貂巢其上，張弓焚巢，則  
貂墮于羅，取山澤魚鹽之產，易我中國之財，故酋日富，酋歲貢

蜜兼開蜜市自癸丑後不貢至丁巳相傳虜煉蜜爲糗糧撫臺  
疑其事未敢訟言于朝蜜使遼陽材官蕭子玉僞稱都督叩命  
問故子玉盛具儀仗東臨虜境酋不郊迎子玉大怒詬虜曰天  
使儼臨而大都督不出是辱皇朝也將歸問罪奴酋聞之懼然  
屬橐鞭跽迎道左供具甚豐腆子玉大喜相與盡歡徐致詰不  
貢市之命酋從容對曰本部之蜜猶天朝五穀也五穀有不登  
之年皇朝將誰是詰耶本部五年來花踈蜂死是以不貢俟春  
枝花滿釀熟蜂衙當復貢市如初此瑣事耳何煩聖慮厚贈子  
玉並轡而出至別處從馬上拍子玉肩笑曰汝是遼陽無籍蕭  
子玉也安得假稱都督臨我郊境我非不能殺汝奏之聖明願

不忍貽天朝以辱耳爲我致意撫臺後毋再作詐事子玉狼狽  
西奔撫臺聞之閉門累日中國每事貽笑遠人安得不啓其輕  
侮之心哉已未冬薊人咸云奴酋苦饑一日啜粥一盃識者  
曰實者虛之此未可信薊人亦以酋乏食爲喜迨劉總戎破酋  
寨五穀滿園困奴酋狡詐諸事類此 奴酋破清河先一日其  
子猶與張總戎夜飲極洽酒酣二子忽叩張云屢勸家君止戈  
而壯心不已假令終違苦口元戎何策禦之總戎時已醉盛稱  
中國威德兼揚已長二子微笑而別明日驅紹參車數十乘入  
城紹參窮而軍容見因入據城門延入諸騎故清河之破視撫  
順尤速以後破遼陽破廣寧總之先潰在中國謂奴酋盡以善

戰善攻得則譽寇太甚矣 按遼左之人生二子則以一人私役于奴酋酋給之銀暨紹卒歲而歸值滿十五六金奴酋掠錢無所用之高積如山欲歸者畀銀三兩令盡力負錢命所過給以飲食負重者致腰背盡折故城破之日奴酋驅之而歸不必以兵威劫也 天啓六年八月奴兒哈赤病死

史氏曰語有云爲虺弗摧爲蛇若何奴兒哈赤本一孤雛驟假名號及併南關旁嚙邊吏不聲討竟棄新疆益之廣墾爭車寢有欲炙之色復狃甘言弛備以及潰裂抑已疎矣然建州彈丸地向虛□清撫之糴曾無廣屯厚儲清撫既下不爲守知非有遠志我徵兵漸集葺殘壘爲三肆困之時以輕騎擾彼耕牧計

可坐制死命而銳語出塞自取輿尸搏虎于隅佐鬪于穴幾若  
此而不弊者凡兵莫神于間莫巧于顛倒饑飽勞逸以爲用而  
□早漏師期深入重險棄輜重窖粟以資敵□兼此數者勢始  
日張因并奪我三軍之膽膽破而智勇竝困宜乎遼瀋之爲開  
鐵續也善師者鼓之以膽而運之以略敵銳能挫之敵驕能忍  
之轉敵之權而陰握其全勝不啻與端肅爭烈矣又曰按海西  
南關王台最忠順惜子孫無良以圍墻引外寇自殲二奴北關  
怨毒日深遂快心于王台子若孫自相屠割而奴酋袖手待其  
斃甚矣海西之愚奴酋之黠也人爲肉而我覆爲狙幾是哉原  
海西密邇開鐵爲我屬夷與東西二夷牙錯勢能離其合近歲



拯北關以藩遼稱制奴上策而竟剪焉胥覆爲開鐵續誰職厲  
階一蹶不振悲夫又曰方奴酋長驅開鐵兵不血刃卽蚩尤用  
兵無以過而竟徘徊歲餘不敢越遼瀋尺步何哉凡兵以氣勝  
始吾敗軍之餘不可復鼓奴酋得折箠立下及氣久漸定兵食  
稍集戰不足而守有餘惟養吾全力而操口於饑飽勞佚蹙之  
以漸計彼銳易折而驕口可乘蕞爾一隅自將坐困而無奈戰  
守茫無成畫也戰而失則以不能守爲戰罪守而廛保無失則  
又以不能爲守罪千人與瓢可若何語亦有云誰爲手打賊者

今策奴酋

以下  
闕

毓黻按孟森心史史料謂陳仁錫潛確類書未經清世抽毀

之舊本於第十四卷四夷門收黃道周博物彙第九卷建夷攷云今女真卽金餘孽也國朝分爲三種曰建州曰海西曰野人永樂元年野人酋長來朝建州海西悉境歸附先後置建州等衛置都司一曰奴兒干以統之官其酋孟氏所引陳書之文蓋自博物彙轉錄而來黃氏之書凡二十卷愚得之杭州書肆中缺數卷此文附於卷末署曰奴酋下旁注一削字陳氏署曰建夷攷益改題也此文於建州海西野人三部所居之地未曾明言惟云原奴酋之寨在甯官塔舊址二面臨河一面阻山其城係磚石包砌重圍其地界南臨朝鮮義州橫江爲界離江有一千餘里江外有十四道灣係忽

喇戶故址皆爲奴併西鄰長奠永奠大奠寬奠新奠靉陽孤

山醜場一堵墻清河散羊峪馬根單按今名馬郡鄆在撫順縣境撫順三壘

兒白家衝撫安柴河松山靖安威遠鎮北關北有混同江按

今松花江烏龍江按即今黑龍江白石江江內先有灰扒即輝發部伯答里等

夷皆被奴酋襲殺擄掠又有海西夷南關舊址大黑山地方

亦併入奴酋據此考求建州之所在可以約略得之遼東志

謂建州東瀕松花江江上有河曰穩禿即今溫德亨河又謂之建州

老營馬文升撫安東夷記亦云永樂末招降之舉漸弛而建

州女直先處開原者叛入毛憐自相攻殺宣德間遣使招降

之遼東守臣請以建州老營地俾居之老營者朝廷歲取人

參松子地也名爲建州初止一衛後增置左右二衛蓋建州故地本在今吉林省南部其後漸次移居於今奉天省之東部而舊有老營之地乃爲扈倫四部所篡取黃氏所謂之寧官塔卽今興京寧古塔滿洲語六個之義景祖兄弟六人分城而居謂之寧古塔貝勒後人不察以爲清之初祖本居寧古塔則大誤也興京左倚烟突山右帶蘇子河正所謂二面臨河一面阻山也此爲建州左衛之地清肇祖卽居於是其地東南臨鴨綠江故與朝鮮義州橫江爲界其西鄰長奠等二十一城堡蓋爲明代東邊屯兵之所南北迤長幾及千里李成梁創設之寬奠六堡卽在其中清太祖旣併滅海西野

人諸部盡有建州三衛之地故北境至混同黑龍二江此可  
攷而知也蔣良騏東華錄云太祖同母兄弟三人太祖居長  
次曰舒爾哈齊次曰雅爾哈齊又王氏東華錄云天命九年  
於東京城東北營建陵寢命族弟鐸弼往赫圖阿喇奉移景  
顯二祖梓宮及伯父禮敦弟舒爾哈齊穆爾哈齊靈櫬據此  
則黃氏謂太祖兄弟三人則是一兄一弟則非據蔣書所紀  
太祖於景顯二祖被戕之後屢遘家難寧古塔諸祖子孫有  
謀不利於太祖之事其弟或亦與謀故太祖設計囚之東華  
錄未記太祖母弟二人致死之由然皆早卒必有因也黃氏  
謂太祖弟名速兒哈赤卽舒爾哈齊之異譯惟黃氏又謂景

顯二祖被戕時太祖甫四歲與其弟速兒哈赤俱歸李成梁撫之如子則與東華錄所紀大異東華錄謂景顯二祖被戕於萬曆十年太祖時年二十有五相差至二十年疑黃氏所紀爲得眞明史張希顏傳謂王杲之死在萬曆二年黃氏又謂顯祖塔失死於王杲之役則其時太祖年十數歲以其尙幼故寧遠撫之如子耳吾省故老相傳有李寧遠撫老汗王即太祖爲子之傳說茲得黃書證之其說固非盡屬子虛烏有也

八旗 附水師營

清制內務府祇鑲黃正黃正白三旗有滿洲佐領十五朝鮮佐

領二回子佐領一

順治初始設錄領侍衛內務府大臣康熙中改錄領內務府

蓋爾時滿洲八旗

中有高麗姓如金氏韓氏李氏朴氏張氏傅氏柏氏洪氏崔氏  
劉氏黃氏岡氏楊氏吳氏陳氏文氏孫氏丁氏任氏伊氏宋氏  
徐氏車氏萬氏江氏邊氏何氏閔氏林氏佟氏瓦氏耿氏馬氏  
鄭氏曹氏郭氏沈氏方氏秦氏孟氏田氏辛氏等四十二姓皆  
屬之此諸姓之先世皆居朝鮮易州平壤等處於清初被俘爲

內務府包衣人

包衣滿語僮僕之義清入關以前凡各部落之被俘者皆以爲包衣屬於上三旗者隸內務府

屬下五旗者分隸各王府

其後人口蕃衍日多故設朝鮮佐領以統之然其

後高麗姓不盡隸於滿洲八旗如金簡亦高麗人乾隆間以文學獲主知其女後被選入宮遂命隸內務府漢軍正黃旗後遂以簡爲內務府總管大臣誠異數也大抵高麗之歸附清朝者

其隸滿洲八旗或漢軍八旗雖無一定然凡隸鑲黃正黃正白  
上二旗必屬於內務府則可斷言吾金氏之宗於清初居遼陽  
之東京城隸漢軍正白旗再上溯先世則云來自山東或云來  
自直隸語莫能詳

凡漢軍八旗人皆不能詳其所自

竊謂清初隸漢軍旗者多爲遼

東土著卽使來自內地亦因世代綿遠不能詳其所自向來吾  
漢軍旗人自稱爲大八旗以示別於內務府包衣人也魏劭卿  
吉林地理紀要謂遼東高麗有金韓朴于四姓語殊渾括李蓬  
仙云此四姓皆隸內務府金姓居英什牛彖及撫順于姓居文  
官屯朴姓居道義屯四台子皆在舊承德縣韓姓所居未詳此  
四姓皆居有定所不與他處之同姓異族相棍亂且人亦多知



其出於朝鮮也由此言推之其不隸於內務府之漢軍旗人不得以高麗遺裔目之可知矣

魏劭卿壘耻廬筆記云吉林省城清代設有水師鳥槍兩營各設佐領一又有參領一員統轄之皆漢軍旗若滿蒙人向無遷轉及此者余常疑之以謂水師當始康熙朝征剿羅刹時期近讀劉繼莊廣陽雜記乃謂志載閩人林興珠爲吳三桂部將降清封建義侯曾與清聖祖論火器之利因及滾牌之用乃召臺灣降人之遷墾於直魯者其人皆習水師適清廷有北征羅刹之役命林率之往與滿將彭春水陸分進圍攻雅克薩城

今江省漢

河西連登鎮對岸  
現俄名阿勒巴金

林令其衆沒水蔽滾牌於頂以禦羅刹舟師

之火器各執扁刀橫砍而前敗之更擬月火攻羅刹懼納降雅  
克薩城乃下林還朝上獎爲奇功因置水師於關東云余有友  
爲水師中人往常詢其祖籍謂皆來自康熙以二藩之叛編管  
來此淵源所自蓋不誣耳毓黻按皇朝文獻通考順治十八年  
設吉林水師營以遷移人充水手康熙三年設吉林水師總管  
各員總轄水手十三年移水師營總管於黑龍江地方於吉林  
水師營設四品五品官各二人十六年增設水師營六品官二  
人二十六年設吉林運糧船漢軍水手二百五十八名修船匠  
四十八名卷一百八十二吉林通志亦引之又吉林將軍衙門兵司冊報光緒  
十四年復設總管一人六品二人以上皆見吉林通志五十一又吉林通志雍

正十一年設鳥槍營參領一佐領驍騎校各八人

會典事例作乾隆元年設

以臺站官屯水手各漢軍餘丁選充鳥槍兵一千名乾隆二十

五年增漢軍鳥槍兵三百二十八名

以上皇朝通攷一百八十二

又吉林外

紀順治十五年造戰船康熙二十二年造運糧船設立水手營

疑卽水師營 雍正十一年揀選水手營閒散官莊壯丁一千名設立

鳥槍營與滿洲蒙古陳漢軍一體當差

鳥槍水師兩營皆屬於新漢軍旗

此水

師鳥槍兩營設置之大略也王氏東華錄康熙二十二年尙書

伊桑阿以造船赴寧古塔此與吉林外紀所紀相合水師營蓋

立於是時又載康熙二十四年議征羅刹上諭王大臣朕意選

福建投誠善用籐牌官兵見在八旗及安插山東山西河南者

付臺灣投誠左都督何佑等率往籐牌各帶礮彈或十圓或二十圓給馬二千匹以行其餉銀兵月給二兩官月給三兩命都統公彭春統兵又關保奏云我兵擬水陸進發先期雷雨大作至二十六日江水泛溢又風逆舟不得前及二十七日天晴水落二十八日平旦忽轉順風我兵揚帆溯流直上三日之程一朝而至陸路之兵雖疾行不及卷八及卷九此節所記亦與廣陽雜記脗合惟不及劉氏所紀之詳耳

寄籍諸氏

有清一代吾遼東人之流寓他方寄籍不歸者實繁有徒大別言之一爲駐防之旗人一爲宦遊之漢人旗人本貫不盡能詳

可置弗論漢人中之卓卓可稱者以吾所知得有數人焉

吳雯 清國史本傳云吳雯山西蒲州人本貫遼陽父允升任蒲州學正卒於官遂籍於蒲王士禎吳天章墓志銘云君諱雯字天章其先遼陽人也父允升中順治二年順天鄉試六年授蒲州學正十二年賜同進士出身明年卒君幼孤母朱有節操撫君及弟霞等皆成立遂籍於蒲毓黻按今流傳之楹聯彙刻有雯書二聯一署曰河中吳雯從寄籍也一署曰遼陽吳雯從本貫也

蔣攸銛 清國史本傳云攸銛漢軍鑲藍旗人先世由浙江遷遼東國初入關居寶坻李元度國朝先正事略云蔣襄平相國

者名攸銛字穎芳號礪堂遼東襄平人隸漢軍旗籍父韶年官知州生母徐氏禱於蘇郡五卮山生公於江蘇布政司理問署中蜀人李惕夫大令超理云礪堂相國帥蜀五年惠澤及民卓著勛望兒時即聞父母稱頌及之後肄業錦江書院見講堂之匾及跋語皆公手書字體凝重想見大臣風度而省門父老述公德政尤津津焉蓋已逾五十年矣觀本傳則歷官所至皆偉績爛然乃以辦理黃玉林一案獲咎致被降調歿於中途身後竟未邀易名之典此亦太平時一憾事也使今日督撫有如公其人爲國宣力亦何至敗壞若是哉賞不償勞可爲三歎非特部民之私見也已毓馥按此文見吉林圖書館藏本國朝耆獻

徵略蔣礪堂傳後爲大令所手批外間罕見故具錄之以見鄉先正流風善政之及人遠入人深也蔣氏先世蓋漢人清初投旗入關後世居寶坻公歿亦葬於是先正事略不載遷居之事一若公世仍居遼東者此不可不正也

孫曰秉及子馮翼

孫淵如

星衍

撰孫葆年中丞行狀云公姓

孫氏諱曰秉字德元一字葆年奉天承德縣人乾隆辛巳進士累官江寧布政使貴州巡撫年七十一卒星衍官山左時與公同僚及歸僑居金陵公以同族有過從之雅又有桂林授經圖爲家方伯作及家方伯題王蓬心所摹董北苑瀟湘圖二詩俱見平津館文稿及濟上停雲集所云家方伯卽謂葆年也葆年

之次子馮翼字鳳埔後更名彤出嗣其弟曰兪以與淵如有通家誼亦時相往來其校刊之間經堂叢書二十種卽有與淵如合輯者孫氏本承德人以久宦江南子孫遂流寓不歸今北京大學圖書館藏有問經堂叢書題曰承德縣馮翼校訂並鈴嚴鐵樵可均收藏小印蓋爲初印本又有通儒手澤尤可寶貴

奉天

圖書館亦藏是書

前檢貴和墳昆仲所輯之瀋陽縣志人物門中尙無

孫氏父子之名往時遼東博學多聞銳於輯逸刻書者只此孫氏一人亟宜補入以爲後學矜式

右述諸氏不過略舉一二而已他如遼陽朱倫瀚父子入居京師籍宛平縣鐵嶺高其倬其位其佩兄弟亦以仕宦居京不歸



鐵嶺李輝祖則久宦於蜀其子鏞則家於直隸之盤山凡此諸氏其祖若宗皆遼東人而其足跡實未東出渝關一步今日流傳諸氏之題署輒曰遼東朱氏鐵嶺高氏李氏不知者遂曰謂諸氏曾居遼東豔稱以爲閭里之榮不知其去之彌遠也

清代作者 詩家 文章家 畫家

有清一代作者輩出吾遼東人與之角逐壇墀上下議論者亦實繁有徒大別言之一曰詩家二曰文章家三曰畫家

清代遼東人之詩入選本者自沈歸愚尙書之國朝詩別裁集始綜而輯之共得二十三人其後鐵梅菴中丞輯熙朝雅頌集專錄八旗人之詩漢人之詩例不入選雖無以窺其全豹然而

遼東先正之作大略具於是矣鐵氏所采諸家姓氏爵里已見人物門茲將沈氏所采諸家具錄於左

徐元夢字善長遼陽人康熙癸丑進士官至大學士諡文定錄詩

四首 按公為滿洲正白旗人姓舒穆錄氏號蝶園舒與徐滿音略同而字義亦近故天下穆蝶園徐先生或云公父生

公時夢一老叟至自云徐姓因以命名為誌

成德字容若遼陽人康熙癸丑進士丙辰殿試官侍衛著有通

志堂集錄詩五首 按成德原名性德姓納喇氏為葉赫之裔父明珠官大學士年三十一卒

吳興祚字伯成遼東清河籍舊本浙江山陰人官至大司馬著

有留村詩稿錄詩二首 按詳見人物門

吳秉謙字鳴貞遼東清河人錄詩一首 待考

戴梓字文開浙江仁和人佐康熙親王平三逆有功王假以監軍

道職後因能詩聖祖命直南書房

錄詩三首按文開後以事謫戍瀋陽未歸子亨登

進士第籍瀋陽已見人物門

高其倬字章之奉天鐵嶺人康熙甲戌進士官至戶部尙書諡

文良著有味和堂集

錄詩十一首按公事蹟已見人物門

佟法海字淵若滿洲人康熙甲戌進士官至兵部侍郎著有悔

翁集

錄詩三首按淵若為佟襄勤公嗣賴之孫忠勇公國維之子先世居開原繼遷撫順

鄂爾泰字毅菴奉天人康熙己卯舉人官至大學士諡文端

錄詩

十一首按鄂公滿洲鑲藍旗人姓西林覺羅氏先世居汪欽汪欽即今之吉林汪清縣也

喻成龍字武功奉天人官至刑部侍郎著有塞上集

錄詩一首按喻公

漢軍正  
藍旗人

曹寅字子清奉天人官江寧織造著有棟亭詩稿

錄詩二首  
按寅為漢軍

鑲藍旗人世居瀋陽一字棟亭號勳軒官通政使江南織造校刊古書甚精今傳本有棟亭十種子霑字雪芹工詩著有紅樓

夢小  
說

揆敍字愷功滿洲人官至都御史

錄詩一首  
著有戒堂集鷄肋集  
按公諡文端

于養志字涵一奉天人官四川巡撫著有讀易草西征集

錄詩一首

待考

賽音布字九如滿洲人

錄詩二首  
按公為滿洲正白旗人姓索綽爾

劉廷璣字玉衡遼陽人官至江南淮徐道著有葛莊詩鈔

錄詩三首

已見人物門  
按公事蹟

舒瞻字雲亭滿洲人乾隆己未進士歷任浙江知縣錄詩五首按公爲

滿洲正  
白旗人

夢麟字文子蒙古人乾隆乙丑進士官至工部侍郎錄詩七首按公一

字午塘蒙古正白旗人  
姓西魯特世居科爾沁

馬長海字匯川遼陽人著有雷溪草堂詩錄詩三首按公  
事蹟已見人物門

高述明字東瞻滿洲人東軒相國兄官至涼州總兵錄詩二首  
詳見高

斌條

高斌字東軒滿洲人官至大學士錄詩一首按公元隸內務府  
佐領賜隸滿洲鑲黃旗一說公

爲遼  
陽人

鮑鈺字冠亭奉天人官海墉通判錄詩一首按鈺字西岡世  
籍雲中後爲奉天正紅旗人

有詩集四十卷及道腴  
堂文稿亞谷叢書行世

李鐔字鐵君奉天人著有豸青山人集

錄詩五首  
事蹟已見人物門  
按公

陳景元字石閭奉天人布衣

錄詩四首  
事蹟已見人物門  
按公

蔡琬字季玉遼陽人綏遠將軍毓榮女高文良公其倬繼室誥

封一品夫人著有蘊真軒小草夫人無書不讀諳於政治文

良奏疏移檄等項每與商酌定稿閨中良友也詩集無可覓

於選本中錄取四章皆擲地有聲者

錄詩四首  
待考

### 右詩家

清宗室盛昱漢君楊鍾羲取八旗一百九十七人之文分類十

六為卷六十名曰八旗文經蓋取典論文章經國之大業之語

以名之也盛氏之言曰取大石興安以南庫葉島以西松花江  
嫩江合流處以東北甸以北之人百分之一曰滿洲旗黃河以  
東瀚海以南嫩江東岸以西長城以北之人千分之一曰蒙古  
旗取故明遼東都司以及十三布政使司之人萬分之一曰烏  
超哈旗今名漢軍喀爾喀準噶爾亦時編入以黃白紅藍鑲正  
別之宗室覺羅各隨其所食采地之戶亦繫以旗是曰八旗凡  
不入旗之滿洲蒙古漢人曰民番回仍其稱其取而編爲旗人  
者聚之於京師陪都留之於故地散之於畿輔遷於邊城駐之  
於各行省八旗文  
經攷據此所論則八旗人之不盡籍遼東審矣然遼  
東作家多半見於此書茲取其有籍貫可攷者哀而錄之得七

十有四人

范文程字憲斗號輝嶽瀋陽人隸漢軍鑲黃旗仕至秘書院大

學士卒諡文肅 存文一首

甯完我字公甫遼陽人隸漢軍正紅旗仕至國史院大學士卒

諡文毅 存文一首

蔡士英字伯彥號魁吾錦州人隸漢軍正白旗仕至漕運總督

卒諡襄勤 存文二首

趙廷臣字君鄰鐵嶺人隸漢軍鑲黃旗仕至浙江總督卒諡清

獻 存文二首

甘文焜字炳如瀋陽人隸漢軍正黃旗仕至雲貴總督諡忠果



存文一首

范承謨字觀公號螺山文程次子仕至福建總督諡忠貞 存文

一首

卞三元字月華一字桂林隸漢軍某旗仕至雲貴總督卒諡恪

敏

存文二首 按國朝畫  
徵錄以公為三韓人

吳興祚字伯成一字留村鐵嶺人隸正紅旗仕至兩廣總督

按已見前 存文四首

蔡毓榮字仁菴士英次子仕至雲貴總督 存文一首

靳輔字紫垣遼陽人隸漢軍鑲黃旗仕至河道總督卒諡文襄

存文六首

成德字容若改名性德納喇氏隸滿洲正黃旗仕至侍衛 按

已見前

存文二十七首

曹寅字子清一字棟亭號荔軒一號雪樵瀋陽人隸漢軍正白

旗工部尙書曹璽子仕至通政使

按已見前

存文一首

子成龍字振甲廣甯人隸漢軍鑲紅旗仕至河道總督卒諡襄

勤

存文一首

蔣國祥順天寶坻人隸漢軍鑲藍旗仕至長蘆鹽運使 按公

原籍遼陽爲攸鈺之祖

存文一首

卞永吉字謙之三元子仕至四川綿州知州

卞永譽三元子永吉兄

存文一首

佟世思字儼若一字葭沚又字退菴一作退之先世居佟佳地

方隸漢軍鑲藍旗仕至思恩令

存文十首

喻成龍字武功隸漢軍正藍旗仕至湖廣總督

按已見前存

文一首

范承勳字蘇公一作銘公號眉山別號九松文程第三子仕至

兩江總督

存文二首

郎廷極字紫衡號北軒廣甯人隸漢軍鑲黃旗仕至漕運總督

卒諡溫勤

存文二首

金德純字素公遼陽人隸漢軍正紅旗

存文一首

范承烈字彥公文程第四子仕至兵部侍郎

存文一首

劉廷璣字玉衡號在園隸漢軍鑲紅旗仕至江西按察使 按

已見前 存文二首

揆敘字凱功號惟實居士仕至都御史諡文端 按已見前 存

文二首

鄂海溫都氏自署吳遜世居納殷江地方隸滿洲鑲白旗仕至

川陝總督 存文三首

范時崇字自牧號蒼崖承謨子仕至兵部尙書 存文一首

卓保號鶴亭遼陽人隸漢軍正黃旗仕至內務府總管卒諡文

恪 存文一首

安圖瓜爾佳氏世居蘇完地方隸滿洲正白旗仕至郎中 存文

一首

能泰那木都魯氏世居瓦爾喀琿春地方隸滿洲正白旗襲雲

騎尉世職 存文一首

高其倬字章之號芙沼又號種筠鐵嶺人隸漢軍鑲黃旗仕至

雲貴廣西總督卒諡文良 存文二首

年希堯字允恭廣甯人隸漢軍鑲黃旗仕至廣東巡撫 存文一首

蔡珽字若璞號禹功別號無動居士又號松山季子毓榮之子

仕至直隸總督 存文一首

福敏字龍翰號湘鄰富察氏世居訥殷地方隸滿洲鑲白旗丁

丑進士改庶吉士 存文三首

年羹堯字亮工號雙峰希堯弟仕至川陝總督 存文一首

鄂爾泰字毅菴西林覺羅氏世居旺沁隸滿洲鑲藍旗仕至雲

貴廣西總督卒諡文端 存文十四首

阿克敦字立恆一字恆巖章嘉氏先世居長白山裴雅郎阿地

方隸滿洲正藍旗仕至刑部尙書卒諡文勤 存文一首

岳禮字蕉園那木都魯氏世居琿春地方隸滿洲正白旗仕至

漢興兵備道 存文一首

鄂爾奇字秀正一字復菴號懼客爾泰弟仕至兵部尙書 存文

一首

鄂禮爾泰弟仕至天津鎮總兵官 存文一首

朱倫瀚字涵齋又字亦軒號一三先世山東歷城人隸漢軍正

紅旗仕至湖北驛鹽道 按公先世遼陽人已見前 存文一首

達禮字履中鄂海子仕至郎中 存文三首

莽鵠立字樹本一字卓然伊爾根覺羅氏先世居葉赫地方隸

蒙古正藍旗仕至陝西甘肅巡撫卒諡勤敏 存文二首

馬林保字聖謨號容齋輝發納蘭氏隸滿洲鑲紅旗 存文一首

李鐸字鐵君一字眉山號鷹青山人別號幽求子又號焦明子

鐵嶺人隸漢軍正黃旗著有原易春秋通義尙史曉巢集後集

按已見前 存文七十一首

黑鼐字石夫舒舒覺羅氏世居葉赫地方隸滿洲正紅旗 存文一首

陳景元字石閭隸漢軍正紅旗有居白室詩集 按已見前

文存

一首

鮑鈇字冠亭一字西岡號辛圃自號夢崦居士晚號待翁山西  
應州人隸漢軍仕至嘉興府海防同知 按沈歸愚謂公爲奉

天人已見前

存文十二首

顧琮字用方伊爾根覺羅氏先世居松阿里烏喇地方隸滿洲

正白旗改隸鑲黃旗仕至江蘇浙江巡撫

存文二首

高斌字東軒遼陽人隸漢軍鑲黃旗後改隸滿洲稱高佳氏仕

至江南河道總督卒諡文定

存文三首

唐英字俊公一字叔子晚號蝸寄老人瀋陽人隸漢軍正白旗



仕至粵海關監督

存文五首

常安字履坦葉赫納蘭氏隸滿洲鑲紅旗仕至浙江巡撫

存文七首

二首

尹繼善字元長號望山章佳氏原居長白山俄漠和蘇魯繼遷  
宜漢阿拉地方隸滿洲鑲黃旗仕至江南總督諡文端 按已

見前

存文三首

舒赫德字伯容別字明亭舒穆魯氏世居琿春都瑪呼村地方

隸滿洲正白旗仕至陝甘總督諡文襄

存文一首

楊應琚遼陽人隸漢軍鑲白旗改正白旗廣東巡撫文乾子仕

至雲貴總督

存文一首

常鈞常安弟仕至湖南巡撫 存文一首

李瀚字文瀾又字受川先世居遼陽地方隸內務府鑲黃旗漢

軍仕至雲南巡撫 存文一首

觀保字伯容一字補亭索綽絡氏賜姓石氏隸內務正白旗滿

洲石東村子仕至左都御史卒諡文恭 按東村爲李鏊之友

長白人方望溪所作二山人傳是也 存文一首

國梁字隆吉一字丹中號笠民哈達納喇氏隸滿洲正黃旗仕

至貴州糧驛道 存文一首

于宗瑛字英玉號紫亭成龍孫仕至江南道有來鶴堂集 存文一首

朱孝純字子穎號思堂一號海愚倫瀚子仕至兩淮鹽運使 存文一首

一首

鼇圖字伯麟號滄來宗瑛子仕至淮揚道 存文一首

伊湯安字小伊號耐圃拜都氏世居葉赫地方隸滿洲正白旗

仕至河南按察使 存文四首

西清字研齋鄂爾泰曾孫 存文一首

李堯天字宛林號香湖隸漢軍某旗仕至江蘇淮安府知府 存文

一首

蔣攸銛字穎芳號礪堂仕至兩江總督卒諡文勤 按已見前

存文三首

滿保舒舒覺羅氏世居哈達地方隸正黃旗滿洲 存文一首

佟慶文字質夫號艾生隸漢軍鑲黃旗嘉慶間仕至廣西按察

使 按靜觀齋叢錄作遼東人 存文一首

富呢揚阿字藝林號海帆納音富察氏先世居納音地方隸滿

州鑲黃旗仕至陝西總督 存文一首

銘岳字瘦仙號東屏蘇完瓜爾佳氏隸漢軍正白旗仕至南康

府同知 存文二首

徐榮原名鑑字鐵孫先世監利人家遼東隸漢軍正黃旗仕至

福建汀漳龍道 存文一首

官文字秀峯王氏遼陽人內務府漢軍正白旗改隸滿洲仕至

直隸總督卒諡文恭 存文四首

寶盞字佩珩一字佩蘅索綽絡氏世居吉林地方隸滿洲正白

旗仕至武英殿大學士卒諡文靖

存文一首

麒慶字寶臣號玉符輝發那拉氏隸滿洲正白旗仕至熱河都

統卒諡莊敏

存文四首

豫山字東屏蘇完瓜爾佳氏隸滿洲正黃旗仕至山西巡撫

存文

一首

宗山字獻梧魯氏鐵嶺人隸內務府鑲黃旗漢軍仕至乍浦理

事同知

存文一首

### 右文章家

有清一代畫家指不勝屈吾遼東人以畫名家者世皆知有高

且園朱涵齋不知其尙不止此也茲就張庚國朝畫徵錄馮金伯國朝畫識蔣寶麟墨林今話張鳴珂寒松閣談藝瑣錄四書所載遼東畫家共得十七人皆卓卓有聲稱者比而觀之流風所被庶幾聞者有所興起也

孟永光字月心山陰人工人物寫真受業於孫克弘後遊遼東從龍入燕性高曠不樂仕進以畫祇候內庭爲世祖所眷命內

侍受其筆法

畫徵錄

孟永光字月心會稽人孫雪居徒也後

遊遼佐從龍入燕性高曠不仕時稱狂士作畫不落故套世祖最愛重之月賜廩粟內侍張篤行其弟子也

圖畫寶鑑

侈世晉字康侯襄平人善山水多黃大癡高尙書法布置鄭重

墨暈淋漓曉有氣概惜秀逸之致未能發于腕底耳蝦蟹亦佳

同上

呂猶龍三韓人福建巡撫調撫浙江三日卒於任善山水得先  
人倪黃兩家法而師少司農麓臺之氣韻邱壑峻邃有意趣每  
接筆墨之士輒談論忘倦其所好者蓋深也 同上

高其佩字章之號且園遼陽人善指頭畫人物花木魚龍鳥獸  
天姿超邁奇情異趣信手而得四方重之余曾見扇上筆畫散  
仙數種尤妙有如黃初平叱石成羊作亂石一攢或已成羊而  
起立者或將成而未起者或半成而未離爲石者神采熠熠風  
趣橫生他如龍虎等亦各極其態世人祇稱其指墨而不知筆

畫之佳也人既重其指墨加以年老便于揮灑遂不復筆故流傳者少官刑部侍郎同上高少司冠工指頭畫凡花木鳥獸人物山水靡不精妙雨中烟樹蓑笠野翁雲氣拂拂更爲奇絕

陸闡亭養疴閒記

李世倬字漢章號穀齋三韓人兩湖總督如龍子侍郎高其佩甥善畫山水人物花鳥果品各臻其妙少隨父宦遊江南見王石谷得其講論後與馬退山游故宗傳醇正而筆亦秀整其人物官晉上時得吳道子水陸道場而閱之遂悟其法其花鳥果品各種寫意蓋得諸舅氏之指墨而易以筆故能各名一家亦如王甥之善學趙舅也今官通政司右通政

畫徵錄



崔鐸字象州三韓人工人物士女學焦秉貞法傅染淨麗風情  
婉約雖未能方駕古人而翩翩足雋一時矣畫梅亦佳今官州

牧同上

莽鵠立字卓然滿洲人官長蘆鹽院工寫真其法本於西洋不  
先墨骨純以宣染皴擦而成神情逼肖弟子金玠字介玉諸賢  
人同上

佟毓秀字鍾山滿洲人甘肅巡撫山水法元人率筆各自標其  
逸趣同上 佟毓秀襄平人皖撫吉臣子也遊錢松崖之門得

其畫法名噪一時圖繪寶鑑

朱倫瀚明宗室善指頭畫得其舅氏高且圓法一邱一壑雖奇

自正設色沖淡而氣厚喜作巨嶂近日指墨甚衆要以倫瀚爲

優官御史 畫徵錄

三韓卞氏大中丞永譽女善花草賞家稱其工中丞好古精鑒

著有書畫彙考行世宜其女之工筆墨矣 同上

申奇猷字秩公三韓人官縣令善山水 圖畫寶鑑

卞三畏字仲華蓋州人孝廉宦輒所至兩袖清風政事餘暇怡

情翰墨寫山水得湍瀨潺湲溪烟霞縹緲之致 同上

戴梓字文開倉之子寫照得父傳兼工山水 圖繪寶鑑梓謫居瀋陽按

奉天朱子穎孝純都統倫瀚子乾隆壬午舉人官兩淮鹽運司

畫傳家學知秦安府時嘗繪秦岱全圖精心結撰不亞古人述

庵司寇又稱其孤松怪石尤有逸氣爲人倜儻奇偉不可一世  
須髯如戟分二支人呼爲戟髯金川用兵匹馬獨往作詩數十  
首而回聞者咸服其豪詩格宕逸有飛鳥與人爭道路噉猿知  
我助悲涼一水漲喧人語外萬山青到馬蹠前等句并爲人所

傳誦張玉川曾畫爲詩意冊

墨林今話

長白瑛寶字夢禪號問庵大學士永公諱貴之長嗣以疾辭蔭  
曾一官筆帖式旋罷去閉門却掃惟以詩歌自娛工畫山水尤  
精指墨張船山太守在都時極推服之余昨見其巨冊十二葉  
山水花鳥果品悉以簡貴勝人題識頗自矜許高且園侍郎後  
常首屈一指又曾爲顧小韓方伯強叔大令作風雨對牀圖墨

氣淋漓布置亦自不凡 同上

東屏觀察銘岳瓜爾佳氏漢軍正白旗人道光乙未進士以知縣分江西屢任繁劇有循良聲文學博雅金石書畫網羅最富工書善畫尤喜振拔寒士名重一時粵西寇起犯九江陷金陵公時居母憂巡撫張文毅公倚其才奏請留辦防剿積功升知府晉道員改江蘇大帥皆重之咸豐庚申二月賊窺浙江蘇撫檄公入浙值軍事子鳳聲方官浙江理事同知公至則以戰守教鳳聲建十五策上巡撫羅壯節公尋省城被圍賊穴地道轟城適近寓舍公父子率家丁巷戰均沒於陣

寒松閣談藝瑣錄

子璞郡丞秀琨漢軍人咸豐初需次粵東工畫山水蒼潤渾厚

在山樵大癡間兼擅花卉一時名重公卿山陰汪芙生瓌旅譚  
云郡丞夢堂相國英廉之姪孫也姓馮氏先世本嘉興人後徙  
山東復徙遼東從龍入關隸漢軍籍王蘭泉司寇湖海詩傳采  
相國詩誤以爲涿洲之馮張南山詩人徵略亦承其誤郡丞嘗  
致書南山屬其改定乃易涿洲爲遼東云 同上

右畫家

右詩畫文章三家去其複見者共得八十有八人以籍隸八旗  
者居十之九而沈氏所稱之遼陽人如徐元夢成容若馬長海  
蔡琬當其人之世皆不居於遼陽所稱之奉天人如鄂爾泰曹  
寅于養志鮑鈔李鐸陳景元當其人之世皆不居於奉天盛氏

所選亦復類是愚僅就故書所紀者比而輯之使成一篇庶攷求先民遺事者省檢閱之勞非可作爲定論也

瑣記

江安傅氏

增湘

雙鑑樓藏有明遼陽傅氏刊顏氏家訓南郡張

璧序云北齊顏黃門家訓質而明祥而要平而不詭全帙寡傳

莫獲攷見頃得中秘本手自校錄適遼陽傅太平以報政來就

余索古書予出之觀且語之故太平曰吾志也是烏可弗傳亟

持歸刻爲太平名鑰以司諫作郡有治行今爲浙江副使愚按

明史無傅鑰傳盛京通志人物門有之其略云鑰字希準廣寧

人正德六年進士授給事中嘉靖間累陞山西按察使終河南

巡撫不知依據何書近人吳廷燮明督撫年表引雷氏列卿表云傅鑰遼東廣寧衛人正德丁丑進士嘉靖十八年以右副都御史任河南巡撫十九年卒於官想爲盛京通志所本傅氏之書刊於嘉靖二年甲申而稱其字曰太平籍曰遼陽蓋太平爲鑰之別號遼陽爲都司治所舉其大者言之也

襄平李鐵君錯尙史七十卷尙史者上古之史也自軒轅氏起訖秦二世止其著書大旨在訂補史記之闕失欲以此作代之以下接漢書所謂斷代史也李氏自序云漢興司馬氏以繼述纘厥緒而著史記網羅放失撫拾舊聞歲歷五百得不淪亡者遷有力焉雖然竊有憾焉延覽未周感憤過節循其所失諒非

一端是故帝統繫德也而少皞闕記諸侯封職也而許邦闕載  
伊傅附論管晏節舉他不得登名者不啻十八九隘矣至若舜  
系七葉周世十五少康不復夏祖甲稱亂殷又其疎也若乃古  
公有興周之言西伯載陰行善之隱武王顯誅帝受周文攝位  
孺子誣聖作姦墮常滅教慙資口實以啓逆萌失之甚者何可  
長乎夫史以傳事事以傳信使治亂之道隆汙之風不得其原  
搥紫間正楊墨害中天德是敗民聽惑焉匪細故也不辭不敏  
緯經翼傳附麗百家自黃帝迄秦輯紀傳世家表志圖合七十  
卷恭人定言覈時求制庶幾昭信避違一歸於道據序所言可  
知其微尙所存有與子長不敢苟同者矣考是書經始於雍正



庚戌迄於乾隆乙丑凡十有六年而成書錯卒後文登陶易爲之付梓並上之四庫館按四庫全書簡明目錄云因馬氏繹史改爲紀傳表志皆以舊文聯綴而成剪裁融貫亦具有條理惟四庫著錄一百七卷本書實七十卷不知因何而異當以後者爲定余謂是書之優點有二一曰整齊昔劉子玄謂史記疆宇寥闊年月遐長而分以紀傳散以書表每論一事而胡越相懸敍君臣一時而參商相隔兼其所載多聚舊記時採雜言故使覽之者事罕異聞而語饒重出可謂勞而無功述者所宜深戒也又謂如漢書者究西都之首末最劉氏之廢興包舉一代撰成一書言皆精練事皆該密故學者尋討易爲其功

以上節錄史通六家篇

繹子玄所言雖非乙馬甲班然以史記之參差較漢書之整齊不無優劣之可分李鐵君竊取斯義乃取史記重加剪裁秦二世以前列傳之未備者補之漢高祖以迄武帝太初七十餘年事已具於漢書者削之參差之作使歸完整變通史之體而爲斷代以與漢書以下二十三史相銜接其規模可謂宏矣此一善也二曰詳瞻班氏之作范曄稱之曰文瞻而事詳又曰瞻而不穢詳而有體使讀之者疊疊而不厭故劉子玄亦稱之曰言皆精練事皆該密此漢書之所長也李氏之書病史記之略凡自唐虞氏以下各代臣宰悉爲立傳其尤要者春秋之世著錄於左傳者史記輒闕而未錄頗疑司馬子長未見丘明之書故

於管晏列傳則語焉不詳於范蠡文種則附載於越世家而不爲立傳子產叔向季札皆春秋之賢士大夫也而不爲之立專傳此皆由當時古籍未盡出文獻無徵不得不從闕略非盡子長之咎也至於有漢七十餘年之事幾佔史記全部之半精神意氣胥寄於是設使全書悉如此之詳瞻則班椽不得專美李氏一本班氏之法斷代爲史凡史記之闕遺者悉爲補之古籍有徵悉以入錄雖所采或屬僞事未知判別又以舊文聯綴而成未能別具鑪錘稍爲可議然大體詳密足補司馬之溯此又一善也李氏家遼東自署曰襄平李氏則爲吾鄉之先正王岷源先生謂遼東人情質樸不好表襮文人學士有所著作藏之

家篋久則散佚後人又無從爲之蒐集故以文字表見者甚希  
所論殊當今得此書覈其極詣政可與周保緒晉略魏默深元  
史類編驂驪後先此誠鄉邦之光宜深引以爲榮者已

近頃於北鎮縣城二十里發見明驃騎將軍張鳳儀墓有碣云  
玄孫朝珍朝璘奉祀按清國史列傳張朝璘漢軍正藍旗人父  
士彥明廣甯巡撫中軍守備清太祖征廣寧明巡撫王化貞遁  
去士彥來降授三等輕車都尉朝璘襲職累官至福建總督封  
一等男賀長齡經世文編著者姓氏小傳有張朝珍朝璘兄弟  
朝珍字玉筍官湖廣巡撫兵部尙書朝璘字溫如官爵如前朝  
珍有詳定刑律疏請免妻孥流徙疏二篇朝璘有請造役船禁

封民船疏一篇具載文編中蓋鳳儀爲廣寧人故其孫士彥仕於本縣爲巡撫中軍守備至其玄孫貴顯始增大墳墓立石奉祀也不有此石則不知朝珍兄弟爲廣寧人

章太炎先生書呂用晦

留良

事云用晦諸孫皆謫甯古塔後以

他事改發黑龍江隸水師營民國元年余至齊齊哈爾釋奠於用晦影堂後裔多以塾師醫藥商爲業土人稱之曰老呂家雖爲臺隸求師者必於呂氏諸犯官遣戍者必履其庭故土人不能輕其後裔亦未嘗自屈也

華國月刊

此文於呂氏子孫改發黑龍

江事語焉不詳王公維宙語毓黻云往在龍江省署檢閱舊檔

載呂氏子孫初戍甯古塔不准應試故皆以授讀醫藥爲業歷

世已久其後裔有聰俊子弟冒他籍納監應舉者爲人揭發身  
遭駢誅復將其全族改發黑龍江設無此檔無由知其始末矣  
按此卽章氏所謂以他事改發者也

嘯亭雜錄云黃雅林初名俊字石咸遼陽人爲青州太守某後  
崇德癸未大兵破青州太守殉節其子孫遂流落廬籍陪京云  
先生學問淵博矜才使氣醫卜藝術之書無不周覽時時述稗  
官家言聞者絕倒自以其名不雅馴遂易名頽以癡者自居

蓋俗

謂癡呆者每  
謂之大頭云

亦好奇士詩畫仿鄭板橋有意矯俗反使性靈汨

沒先恭王甚惜其才華不由正軌時有詩文就之商榷先生輒  
加抨擊酒酣耳熱賓主喧嘖聲驚四座然平時未嘗不嘉其忠

告交誼仍如故也

續錄

按此亦吾鄉耆舊如甘嘯岳之流微汲

修主人紀載竟無人能舉其姓氏者文之不可以己也如是夫  
清國史富察善傳云乾隆四十年十月任盛京工部侍郎兼奉  
天府府尹先是上檢閱各省旱繳應燬書籍內有千山和尚詩  
本語多狂悖諭曰千山僧名函可廣東博羅人因獲罪發遣瀋  
陽刻有詩集恐無識之徒目爲緇流高品並恐瀋陽地方或奉  
以爲開山祖席於世道人心甚有關係著宏响富察善確察函  
可在瀋陽時曾否占住寺廟有無支派流傳承襲香火及有無  
碑刻字蹟查明據實覆奏旋奏盛京通志內載千山和尚來至  
瀋陽之千山雙峯寺建有小塔當卽馳赴查明並無承襲支派

惟雙峯寺查有函可碑塔并語錄詩句其支派僧人法員等實皆愚春均屬務農山僧查函可係獲罪發遣之犯膽敢放蕩詩詞肆意狂悖請將雙峯寺所遺碑塔盡行折毀及盛京通志內所載事蹟逐一刪除報聞

者獻類徵七十八

按此所謂千山卽遼陽之

千山函可能詩當非尋常之縑流高宗所斥爲狂悖者或以一二疑似之語意爲出入非必函可之目無君父也此事去今不

過百五六十而吾鄉故老無有能道之者故擷錄於此以見

當世文網之密

任啓運撰任宏嘉家傳康熙甲戌宏嘉任奉天府丞府丞實典學政生長試者童倅進者例納金丞役藏臥榻下陰籍其名號



曰宿陳丞至更衽則見宏嘉怪訊故得其實盡懲其役反其金  
及試榜發前籍者有名或曰忘諸乎宏嘉曰以賄售者墨必以  
賄黜亦私也余但衡文耳其後內陟通參仁皇戲之指示百官  
曰是蚩者乃不識錢任啓運謂余見奉天十數學政猶屈指首  
公也者獻類徵  
五十九 黻案奉天爲清代之陪京開國元佐喬木世臣  
多籍於此順康之世八旗子弟於弓馬之餘間涉翰墨不甚精  
顯資緣倖進在所不免任公來此督學力祛其弊士風爲之一  
變厥後名宦如鐵嶺高氏遼陽徐氏詞科如王君武武功如多  
隆阿文苑如戴遂堂陳石閭後先輝映足與海內賢哲并爭上  
游衡文之效一至於此哉此事所關匪輕而爲志書所不能詳

故並錄之

蜀人李超瓊字惕夫號石船光緒中葉歷官江蘇省無錫江陰知縣官無錫時前任某君卒於任所妻子貧不能歸惕夫調卹甚厚某君舊藏國朝耆獻類徵三百冊分度三篋其遺孤舉以遺之惕夫不知何時又流入吉林圖書館本書所稱引者卽李氏舊藏也李氏於每卷中皆有題識於清代名宦世族頗能舉其軼事爲編中所不能詳者其學識之淹通文章之俊偉亦可以窺見崖略惟其身世政績皆不能詳容覓蜀人問之當有知者惕夫稱與徐公與齋爲友徐公名慶璋字與齋浙江省人光緒甲午歲官遼陽知州中東釁起海城以南盡失守烽火達於

遼陽城守尉耆公大懼不知所措徐公曰勿恐也城守事吾任之養練軍數營夜列炬登城炫耀百里外日軍望見之不敢偏會和議成日軍退遼陽得以無恙公之功也公在遼陽治事勤斷獄明邑人呼之曰徐青天以城守功升任甘肅慶陽府知府旋擢甘涼道卒於官虧公帑若干遺族貧乏無以償其少君曾一至遼陽釀資衆紳商感念遺愛頃刻立集吾鄉有河隄溝渠爲公在任時倡葺沙河水不爲大害者垂三十年公之功不亦偉歟袁簡齋大令爲龍會公作墓志銘詞甚奇古惕夫云隨園此銘真足與會公稱偉觀哉吾欲以贈亡友徐與齋云其銘曰收束百骸歸以膽盱天睨地無不敢南山白額虎耽耽縛之如

豕笑而噉焦原不顛平地撼未竟其施心尙欲開公元堂風慘  
慘萬古白虹起此坎

遼東文獻徵略卷八 終

新東交際禮卷八

之禮

命

禮

禮

禮

禮

禮

禮

禮

遼東文獻徵略跋

遼東爲古用武之邦居民恆以戈馬弓矢相尙文獻無徵其來  
舊矣中原人士考之或不能密載之或不能詳間有一二犇刀  
出塞亦祇就足履所蒞略述見聞範圍束而不廣部署龐而不  
整求能依類綴緝溯源汎流上躋古之作者蓋不數數覲吾師  
靜晤先生邃於輿地之學惕遼東文獻霾沒之不彰也從政餘  
暇輒歷延邦人口諮筆錄凡所謂地理之遞變鄉耆之蛻遺必  
一一載之於簡揆一碑訪一地則必辨其文物窮其廣輪且復  
體範羣書歸於至當往往一事得而諸事皆得如網之在綱如  
水之赴壑質諸鬼神而無疑俟之聖人而不惑

式敘從遊既久

每見先生一室獨處羅陳圖史蹠屐左右恆至宵分其專且勤  
如此夫爲學於已定之餘旣斷溝通塗澤光大人人得免焉獨  
於音其黜音其復迴之境舉世之所不爲古籍之所未備於此而克挈  
往挾今出幽爬昧彈付是非剖析毫釐開獐狃之奇觀以待後  
之學者於是乎爲難能撰述旣畢式敘與關子義鐸共董校勘  
總四閱月而歲事謹將是書旨趣誌於卷末俾讀者有考焉民  
國十五年長至節日門人黃式敘附書

遼東文獻徵略校補

卷一

宜名遼東 按名應作曰 十四頁前七行

韓州 按曹廷杰東三省輿圖說云道光元年吉林將軍富俊

赴昌圖廳八面城查案得一出土銅鏡背面鑄楷書韓州刺

史四字是八面城卽金之韓州無疑此謂在今遼源縣境誤

三十三頁後七行

俄朶里敦化縣境 按里下脫在字 三十四頁後九行

孟可帖木兒 按孟應作猛 三十五頁前四行

武義 按下脫徙上京三字 三十五頁後四行



遼源 按此二字衍文 六十六頁後三行

卷三

諄諄 按應作諄諄 十三頁前八行

好大王名談德通考名之爲安則因傳譯而致異 按碑稱談

德曰國岡上廣開土境平安好大王則安爲平安之簡稱乃

稱號非名也又號永樂大王亦有安義此皆好大王爲王安

之證 十八頁前二行

埋 按應作理 二十五頁後十行

俸 按應作奉 二十六頁後六行

清安碑刻 按安下脫寺字 三十二頁前十行

稱致足多己 按稱字衍 五十三頁後六行

卷四

匡義軍節度使 按使下脫之印二字 五頁前一行

浩 按應作皓 八頁後九行

卷五

改 按應作攷 十頁三行

德府 按德上脫彰字 二十頁前一行

敦 按應作孰 四十二頁前七行

售 按應作唐 五十一頁後八行

教其盡斯道之極 按當作斯能盡詩道之極 五十二頁前六行

傅 按應作傳 五十七頁後四行

曆 按應作歷 六十三頁前二行

是先生曾官御史 按四庫全書提要卷首乾隆四十七館臣

職名中列翰林院編修今陝西道監察御史王爾烈此亦一

證 六十五頁後九行

見東見續錄 按下見字應作華 六十四頁前二行

### 卷六

弟 按應作第 二頁前五行

龐鑄遼東人田錫義州人李經錦州人 按金史所著籍皆本

之劉祁歸潛志故與中州集有異同 四頁

曰 按應作白 十一頁後十行

籍 按應作藉 十五頁前八行

後 按應作前 二十一頁前一行第一字

卷七

盧 按應作廬 八頁前二行

木郎古 按應作郎木古 八頁後五行

文 按應作天 八頁後十行

僅 按應作堪 九頁前四行

十之六七 按七字脫落應補 十頁後二行

故 按應作固 十頁後九行

同 按應作日 十九頁後八行

按王彥潛下一節 按已見卷四第十四頁此節重複宜刪

二十頁前二三兩行

舊 按應作書 二十頁後一行

劉江 按日人稻葉君山滿洲發達史引皇明實錄云宣德七

年勅曰令都指揮劉清領軍松花江造船運糧據此則磨厓

題字者乃劉清也原作劉江誤 二十五頁後八行

設立永樂九年 按立下脫於字同上

奄利大水 按奄利卽亦拉之音轉一作依蘭卽松花江之別

名 二十七頁前三行

禮 按應作體 三十二頁後九行

己未麻厯卷 按應作乙未厯□卷 三十五頁前十行

吳與祚 按與應作興 三十六頁後一行

回 按應作四 三十七頁前三行

廿二史文鈔 按二字脫 四十頁後二行

### 卷八

縱 按應作蹤 三頁前二行

董上被戮 按上應作山 四頁後八行

縣 按應作孫 二十一頁前四行

君 按應作軍 二十四頁前九行

漢 按應作漢 二十六頁後二行

璫 按此字倒印 二十八頁後十行

祥 按應作詳 三十六頁前五行

余 按應作愚 三十七頁後五行

未 按應作末 三十七頁後九行

溯 按應作闕 三十八頁後八行

拏 按應作拏 三十九頁前十行

李超瓊身世政績皆不能詳 按中國人名辭典超瓊字紫璈

合江人同治舉人歷官陽湖江陰上海知縣有循聲善詩文

有石船居士贖稿

民國十六年七月初版

定價現銀兩圓

編輯者 金毓黻

校閱者 穆元植

參閱者 黃式叙

關義鐸

印刷者 吉林永衡印書局

發行者 東三省各大書莊

此書有  
著作權



發汗香 東三省谷大香非

印佩香 吉林永濟印書局

參關香 關 羹 戰

好關香 粵 元 蘇

關神香 金 湘 燻

寶鼎與殿兩關

吳國十六年十月既朔

香卦辭  
此香卦